

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' beṇaḥ

¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios.

² Cate' gwxe yežlion' ba zoacze' len Diosen'.

³ Len' bene' yogo' beṇaḥ, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios.

⁴ Le' nse'e yela' mban. Na' ben' ba zjanape' yela' mban toli tocaṇe da' none', legaquen' ba yo'o be'ni' lo' yichjlažda'ogaquen'.

⁵ Ben' nzi' Xtiža' Dios bide' nse'e be'ni' che yichjlaždao' beṇaḥen', na' la'czla' beṇe' zan bi gosejnilaže'ne' na' bi gwyo'o be'ni' chen' lo' yichjlažda'ogaque', bi gosezaquede' yosocue'eje' be'ni' che'na'.

⁶ Gwzoa to beṇe' le Juan, na' Diosen' gwsele'ne'.

⁷ Juanna' ben' bzoe' beṇe' nis bedeye'e diža' che ben' nsa' be'nin', cont yogo' beṇaḥ guac yesejni-laže'ne'.

⁸ Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' che yichjlaždao' beṇaḥen'.

⁹ Ba bžin ža be'ni' da' nac da' dogualje ba blan' yežlio nga, na' blan' cont gwsenin' lo' yichjlaždao' note'teze beṇe'.

10 Ben' nzi' Xtiža' Dios zoe' yežlion' cate' gw̄xeten. Na' la'czla' len' bene' yežlion' ben' že' yežlion' bi gosacbe'ede' non' naque'.

11 Golje' ladjo neto' beṇe' gualaž che', perw zan neto' beṇe' gualaž che' bi gw̄yejle'to' chen'.

12 San balteze chio' gw̄yejle'cho che', chio' gw̄yejnilaže'chone', bene' cont naccho xi'in Dios.

13 Na' gague lagüe goljcho nita' xaxṇa'cho zjanaque' beṇe' bela' chen ba naccho xi'in Dios. Na' gague lagüe to beṇe' byo gw̄zoalene' to no'ole ba naccho xi'in Dios, na' gague lagüe beṇe' byon' goclaže' soa xi'ine' ba naccho xi'in Dios, san da' chejnilaže'chone', da'nan' non Diosen' chio' xi'ine'.

14 Jesucristo ben' nzi' Xtiža' Diosen' golje' goque' beṇaḥ na' gw̄zoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in Dios. Leca nži'ilaže'de' chio' beṇaḥ na' bedezejni'ide' chio' diža' li che Diosen'.

15 Juanna' ben' bzoe' beṇe' nis be'e diža' che', gwne':

—Che bengan' bi'a diža' cate' gwnia': “Beṇe' za' za' zaca'che' ca neda', le ba zoacze le' cate' biṇa' soa neda'.”

16 Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'.

17 Da' Moisésen' bzejni'ide' da' xozxta'o neto' beṇe' Israel ley che Diosen' na' chlo'en yogo'cho napcho doḷa', na' Jesucriston' bedelo'ede' nži'ilaže' Diosen' chio' beṇaḥ na' bedezejni'ide' chio' diža' li che Diosen'.

18 Nono na' soa bene' ba ble'ede' Diosen'. Toz ben' nac dogualje Xi'in Dios beṇe' tliša' ba bzejni'ide' chio' beṇaḥ can' nac yichjlaždao' Diosen',

le chacchgüe Diosen' le'.

Juan ben' bzoe' bene' nis be'e xtiža' Jesúsen'
(Mt. 3:11-12; Mr. 1:7-8; Lc. 3:15-17)

¹⁹ Bene' chesenabi'e nación Israel cheton' bene' že' Jerusalén gososele' to chope b̄xoz na' yebale bene' gosalje lo diaža che da' Leví cont gosenabde' Juanna' non' naque'.

²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho sela' Diosen' yedenabi'e nación chechon'.

²¹ Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

²² Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' che cuino'?

²³ Nach Juanna' gože' legaque':

—Neda' naca' ben' chne žiže to latje daš, žia': “Le gwža' yichjlažda'olen' cont gwzenagle che Xanchon' cate' yide'”, can' gwna da' Isaías ben' be' xtiža' Diosen' cani'.

²⁴ Bene' ca' ja'ac lao Juanna', bene' fariseo ca' gosesele' legaque'.

²⁵ Nach gose'ene':

—¿Bixchen' chzo' bene' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen?

²⁶ Nach Juanna' gože' legaque':

—Neda' chzoa' bene' nis, na' gachol le'e ba zoa to bene' biña' gombia'le.

²⁷ Len' za' gwlo'elagüe' na' zaca'che' ca neda', na' da' nacchgüe' bene' zaca' bitw zaca' gona xmandadoe' lechja' no xe'le'.

²⁸ Yogo' da' quinga goquen gan' nzi' Betábara dan' chi' yešla'a yegw Jordán gan' chzoa Juanna' bene' nis.

Jesúsen' yeque'e xtola' benachen'

²⁹ Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtola' benachen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtola'chon'.

³⁰ Che len' bi'a diža', gwnia': “Ben' za' za' zaca'che' ca neda', na' le' ba zoacze' cate' biña' soa' neda'.”

³¹ Neda' bi gocbe'eda' non' naque' perw Diosen' bzejni'ide' neda', na' da'nán' zedezoa' bene' nis cont yogo' chio' bene' Israel gacbe'echo non' naque'.

³² Juanna' lecze gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'añen len le'.

³³ Neda' bi gocbe'eda' še Jesús nan' naque' ben' gwse'la' Diosen', nach Dios ben' gwsele' neda' chzoa' bene' nis gože'nda': “Le'edo' yetj Spiritw chia' na' yega'añen len bene' ba mbeja'. Len'

naque' be_{ne}' gon cont soa Spiritw chian' lo' yichjlaždao' be_{ne}' na' ñabian' lega_{que}'."

34 Ba ble'eda' goc can' gwne' na' cho'a diža' le bengan' Xi'in Dios.

Be_{ne}' nechw ca' gwlej Jesúsen' cont gosaque' le' txen

35 Beteyo Juan ben' bzoa be_{ne}' nis zeche' da' yoble len ye_{ch}ope be_{ne}' zjanaque' txen len le'.

36 Na' cate' ble'ede' gwde Jesúsen', nach gože' be_{ne}' ca':

—Le na' ben' gwse_{la}' Diosen' ben' zaca'lebe' ca xila' dao' ben' chot chio' be_{ne}' Israel cont Diosen' chezi'xene' xto_{la}'chon'.

37 Na' cate' be_{ne}' ca' chope, ben' zjanaque' txen len Juanna', gosende' can' gwnen' nach ja'aclene' Jesúsen'.

38 Nach beye_{ch}j Jesúsen' na' gw_{ne}'e lega_{que}' zjana'ogüe'ne', na' gože' lega_{que}':

—¿Bi chaclaže'le?

Na' gose'ene':

—Maestrw, ¿gan' zo'?

39 Nach gože' lega_{que}':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le ba nac bagwže', ca do cheda tap.

40 Na ca nac be_{ne}' ca' chope' bosozenag xtiža' Juanna' na' gosa'ogüe' Jesúsen', toe' Andrés, be_{ne}' biše' Simón Pedro.

41 Na' Andrésen' za' gone' bichle da' za' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'.
—Na' Mesías zeje diža' Cristo.

⁴² Nach Andrésen' gwče'e beņe' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'in Jonás. Perw yososi' beņe' le' Cefas. (Na' Cefas zeje diža' Pedro.)

Jesúsen' gwleje' Felipe na' Natanael cont bsed blo'ede' legaque'

⁴³ Beteyo Jesúsen' gwchoglagüen' yeyeje' Galilean' na' jaņe'e Felipen' na' gože'ne':

—Yo'o len neda'.

⁴⁴ Felipen' goque' beņe' Betsaida gan' nac laž Andrésen' len Pedron'.

⁴⁵ Nach Felipen' jaņe'e Natanaelen' na' gože'ne':

—Bač ble'eto' ben' bzoj da' Moisésen' xtižen' le'e da' ca' gan' bzoje' ley chechon', na' lecze xtiže'na' bosozoj beņe' ca' goso'e xtiža' Diosen' cani'. Len' Jesús beņe' Nazaret, ben' nac xi'in José.

⁴⁶ Nach Natanaelen' gože'ne':

—¿Bat benecho yesene' Nazaret na' choj beņe' zaca'?

Nach gož Felipen' le':

—Yo'o cont le'edo'.

⁴⁷ Na' Jesúsen' ble'ede' bač zej Natanaelen' gan' zoe'na' nach gwne':

—Na' za' to beņe' Israel gualaž chechon' beņe' naque' beņe' güen. Ne late'ze bi naque' beņe' gwxiye'.

⁴⁸ Natanaelen' bende' xtiža' Jesúsen' na' gože'ne':

—¿Nac chac nombi'o neda'?

Na' Jesúsen' gože'ne':

—Ble'eda' le' šlac zechao' xan yag yixgüigw cate' za' ne Felipen' le'.

⁴⁹ Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' seła' Diosen' yedenabi'o nación Israel chechon'.

⁵⁰ Na' Jesúsen' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'.

⁵¹ Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwseła' Dios golja' beňach.

2

Gota' to yela' güešagna' yež da' nzi' Caná

¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsen' gwyeje' liž ben' gan' gota' yela' güešagna'na'.

² Na' lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'.

³ Na' bebiž vino dan' chese'ej beňe' ca' že'na', na' xna' Jesúsen' gože' le':

—Bich bi vino chegaque' de.

⁴ Na' gož Jesúsen' le':

—¿Bixchen' žo' ca'? le biña' žin hor gwlo'a non' naca'.

⁵ Na' xne'ena' gože' bene' ca' cheson mandadon':

—Le gon bite'tez da' ne'.

⁶ Na' nita' xop yeso' de yej ga chož nis da' chosočin bene' Israel gualaž cheto' ca' par chesa' cheseyib cuine' can' ža ley cheton'. Na' to to yej ca' chožen do xono' che'e o do ši che'e nis.

7 Nach Jesúsen' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten.

8 Nach gože' legaque':

—Le gaše' laten' na'a na' le šjanežjon ben' yo'o lo ne'e lnin'.

Na' gosone' can' gwnen'.

9 Na' ben' yo'o lo ne'e lnin' con bnixen' bi neзде' gan' zan', con bene' ca' cheson mandadw na'ze gosenезде' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan',

10 na' gože'ne':

—Yogo'ze bene' chon lni chdie' vino güen da' chzaca' la'ay cate' chzolao lnin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lnin'.

11 Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

12 Gwde na' Jesúsen' gwyeje' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

Jesúsen' bebeje' bene' cheson ya'a chyo'o yodao' blao

(Mt. 21:12-13; Mr. 11:15-18; Lc. 19:45-46)

13 Na' ba zoa gała' lni che neto' bene' Israel da' nzi' pascw, nach Jesúsen' gwyeje' Jerusalén len bene' ca' zjanaque' le' txen.

14 Cate' bžine' chyo'o yodao' blaon' bene' zan že' chesote' go'ŋ na' xila' na' ngolbex, na' zjachi' bene' chosoše'e mechw.

15 Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chyo'o yodaon', len xila' ca', len go'ŋ ca', na' beslase' xmechw bene' chosoša' mechon' na' gwlo'on'i'ane'e xmesgaquen'.

16 Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

17 Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: “Da' chi'chgua yichja' che ližon' chonten ga saca'zi'chgua.”

18 Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejle'to' zaco' bebejo' bene' ca'?

19 Jesúsen' boži'e xtiža'gaquen' gwne':

—Le yočhiŋj yodao' nga na' šone žaze yeyonan'.

20 Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

21 Perw Jesúsen' bsaca'lebde' cuerp čhen' yodao' cate' gwne' ca', na' legaque' gosone' xbab che yodao' na'zen' gwne' ca'.

22 Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

Jesúsen' nezde' bin' yo'o lo' yichjlaždao' benachen'

23 Šlac gwzōa Jesúsen' Jerusalénna' lo lni pascon' beṇe' zan besele'ede' yela' guac ca' dan' benen' na' gosejle'e naque' beṇe' gwsela' Dios.

24 Perw Jesúsen' bi ben cuine' lo na'gaque', le nombi'e yichjlaždao' beṇaḇhen'.

25 Bi byažjde' no ye' le' xbab da' yo'o lo' yichjlaždao' beṇe' ca'. Le nezecede' bin' yo'o lo' yichjlaždao' to to chio' beṇaḇh.

3

Jesúsen' len Nicodemo

1 Na' gwzōa to beṇe' fariseo beṇe' le' Nicodemo. Goque' to beṇe' gwnabia' che nación Israel ḇeton'.

2 Gwyeje' lao Jesúsen' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zōa Diosen' len le'.

3 Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zōa Diosen' chnabi'e.

4 Nach gož Nicodemon' le':

—¿Nac gon to beṇe' galje' še' ba naque' beṇe' gole? ¿Guaquech yeyo'e lo' le'e xṇe'en' cont galje' yeto?

5 Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zōa Diosen' chnabi'e.

6 Beṇe' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli tocaṇe che beṇe' chesejnilaže' Diosen'. Da'nan' žacho chesalje' yeto.

7 Bi yebando' dan' gwnia' chonen byen yogo' bene' galje' yeto.

8 Cate' chechj be' chechjen gate'teze, na' chendo' choloyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbja' ba boboben yichjlažda'ogaque'.

9 Nach Nicodemon' gože'ne':

—¿Nacxe gac can' žo' nga?

10 Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga?

11 Da' li neto' chyixjue'eto' da' nezeto' na' choe'to' diža' che da' ba ble'eto' na' bi chejle'le.

12 Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

13 Toze neda' naca' ben' gwsela' Diosen' golja' benach za'a yaba na' noch no zoa no ba beyep yaba cont nezde' che Diosen'.

14 Na' can' goc latje daš cani' cate' gwlis da' Moisésen' bel de bronze bde'eba' to le'e yag, can' cheyala' gac yeselise' neda' to le'e yag, neda' gwsela' Diosen' golja' benach.

15 Na' gac chia' ca' cont note'teze bene' yesejni-laže' neda' bi cuiaye'e san gata' yela' mban che' toli tocanē.

Chaque Diosen' benachen'

16 Leca chaque Diosen' chio' benach, na' gwsela' Xi'ine' bene' tliša' cont note'tez bene' chejni-laže'ne' bi cuiaye'e, san gata' yela' mban che' toli tocanē.

17 Na' Diosen' gwsele' Xi'inen' yežlio nga gague cont gwnežjue' castigw che xtola' be_nachen', san cont gwnežjue' yela' mban chegaque' toli toca_ne.

18 'Note'tez be_ne' chesejnilaže' Xi'in Diosen' be_ne' tlišan', bi yesezi'e castigw che xtola'gaquen', perw be_ne' bi chesejnilaže'ne' ba nchoglaon chegaque' yesezaca'zi'e toli toca_ne da' bi chesejnilaže' Xi'in Dios be_ne' tlišan'.

19 Na' can' naquen, be_ne' bi chesejnilaže' Xi'in Diosen' ba nchoglaon chegaque' yesezaca'zi'e toli toca_ne. Nchoglaon yesezacazi'e, le ba bid Xi'in Diosen' nse'e be'ni' che yichjlaždao' be_nachen' perw na' chesyebchde' dan' nac cho_l clal ca be'ni' chen', dan' chesone' da' malen'.

20 Yogo' be_ne' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal.

21 San note'tez be_ne' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' lega_que' cont chesone' can' ža diža' li chen'.

Juan ben' bzoa be_ne' nis be'che' diža' che Jesús'en'

22 Gwde na' Jesús'en' len be_ne' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' be_ne' nis.

23 Na' Juanna' lecze bzo_e' be_ne' nis yež gan' nzi' Enón da' chi' ga_la'ze Salim, le na' dechgua nis. Na' ja'ac be_ne' gan' gwzoen' cont bzo_e' lega_que' nis.

24 Caten' bi_na' yeseyixjue' Juanna' ližyan' goc ca'.

25 Nach gwche' to žaš len be_{ne}' ca' zjanaque' txen len Juanna' na' yeto chope be_{ne}' Israel gualaž četo' che dan' chesezoa be_{ne}' nis.

26 Nach ja'aque' lao Juanna' na' gose'ene':

—Maestrw, ben' gwzoa len le' yeš_{la}'a yegw Jordán_{na}', ben' cho'o xtižen', bačh chzoe' be_{ne}' nis na' yogo'ze be_{ne}' chja'aque' gan' zoe'na'.

27 Nach Juanna' gože' legaque':

—Nono gacxene' še bi gon Diosen' cont yesonxen be_{ne}' le'.

28 Nezczele can' ba gwnian', bi naca' Cristo ben' chbezcho se_{la}' Diosen' yedenabi'e chio', san naca' ben' gwsela' Diosen' cont bia' xtižen' žialaole.

29 Cate' chac to yela' güešagna', toz be_{ne}' byo ben' chšagnan' chzi'e no'olen'. Perw še zoa be_{ne}' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' be_{ne}' zan chosozenague' che Criston'.

30 Len' cheya_{la}' šejch yesonxen be_{ne}' le' na' neda' cheya_{la}' šejch yesan_{la}že' neda'.

Be_{ne}' za' gan' zoa Diosen'

31 Ca nac Cristo ben' za' gan' zoa Diosen', le' naque' be_{ne}' zaca'ch ca yogo'lo_l be_{ne}'. Yezica'chle be_načh zjanaque' be_{ne}' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lo_l be_{ne}'.

32 Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'.

33 Na' note'tez be_{ne}' chosozenag xtiža' ben' za' gan' zoa Diosen', nacia' bena' ne_zde' Diosen' cho'e diža' li.

34 Na' bena' gwseła' Diosen', bena' za' gan' zoe'na', len' cho'e xtiža' Diosen', le Spiritw che Diosen' zoan len le', na' cate' Diosen' choñe' Spiritw chen' bi chyisen' late' güeje.

35 Diosen' chacde' Xi'ine' Criston' na' ba bene' lo ne'e yogo'lol da' de yežlion'.

36 Na' bene' ca' chesejnilaže' Xi'in Diosen' de yela' mban chegaque' toli tocañe, san bene' cheson güedenag len Xi'in Diosen', bi gata' yela' mban chegaque', le Diosen' gone' cont yezaca'zi'e toli tocañe.

4

Jesúsen' be'e diža' len to no'ole Samaria

1-3 Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwnezde' bene' fariseo ca' gosache'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

4 Na' benen byen zjaya'aque' nez da' chde Samarian'.

5 Ca' goquen' besežine' to yež da' nzi' Sicar lo distritw Samarian'. Yežen' chega'anen gala'ze gan' de yežlio dan' bnežjw da' Jacob da' xi'ine' José.

6-8 Na' žia to bej da' nacchgua sitjw da' nzi' Bej che da' Jacob. Ca do guagwbiž Jesúsen' ba chjaxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin

to no'ole Samaria cho'a bejen' cont güe'e nis. Na' Jesúsen' gože'ne':

—Beñ late' nis ye'eja'.

⁹ Na' no'ole Samarian' boži'en gože'ne':

—¿Nacxechen' le' naco' bene' Israel chñabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi chesene lježe' len bene' Samaria ca'.)

¹⁰ Nach Jesúsen' gože'ne':

—Neda' ba goša' le': “Beñ late' nis ye'eja'”, na' šaca' nezdo' da' chaclaže' Diosen' gone' le' na' šaca' chache'edo' non' naca' neda', ba gwñabdon' neda' na' ba beña' le' nis da' choñ yela' mban toli tocañe šaca'.

¹¹ Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choñ yela' mbanna' žo' ca'?

¹² ¿Chacdo' zaca'cho' ca da' xozxta'ocho Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

¹³ Gož Jesúsen' le':

—Note'tez bene' ye'ej nis che bej nga bia'cze bilde' da' yoble.

¹⁴ Na' note'tez bene' ye'ej nisen' gwnežjua'ne' neda', gwbatech bilden' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocañe.

¹⁵ Na' no'olen' gože'ne':

—Bene', beñ neda' nisen' žo' ca' cont bich bilđan' na' bich yida' dexian' nga.

¹⁶ Jesúsen' gože'ne':

—Beyej jel güiž bene' chio' na' le da nga.

¹⁷ Nach gože' Jesúsen':

—Notno be_{ne}' chia' zoa.

Na' Jesús_{en}' gože' no'olen':

—Ledo' can' gwnaon' nono be_{ne}' chio' zoa,

¹⁸ le gayo' be_{ne}' chio' ba gwnita' na' be_{ne}' zoaleno' na'a gague naque' be_{ne}' chio'. Da' li can' ba gwnaon'.

¹⁹ Na' gož no'olen' le':

—Be_{ne}', chacbe'eda' naco' to be_{ne}' chac chyixjue'ede' bi da' ža Dios_{en}'.

²⁰ Da' xoxxta'o neto' be_{ne}' Samaria gosonxene' Dios_{en}' lo ya'an zoa nga, na' le'e nacle be_{ne}' Israel žale Jerusalén_{na}' cheya_{la}' gonxenchone'.

²¹ Jesús_{en}' boži'en gože'ne':

—No'ole, gweyje'le' chia', gwžin ža cate' bi gonen byen gonxenle Dios_{en}' lo ya'a nga ne Jerusalén_{na}'.

²² Le'e nacle be_{ne}' Samaria bi nombia'ya_{ne}'le Dios ben' chonxenle. Neto' be_{ne}' Israel nombia'to' Dios ben' chonxento', na' ladjō' neto' be_{ne}' Israel choj ben' yebej be_{nachen}' lo da' malen'.

²³ Chžin ža na' na'a ba gole', cate' be_{ne}' yesonxene' Xacho Dios_{en}' can' cheya_{la}'cze yesonxene' le', gate'tez nite', lo' yichjlažda'ogaquen' yesonxene' be_{ne}' naque' dogualje Dios, le Xacho Dios_{en}' chey-iljue' be_{ne}' yesonxene' le' ca'.

²⁴ Dios_{en}' bi naque' be_{ne}' bela' chen, naque' spiritw. Da'nan' be_{ne}' yesonxen le', lo' yichjlažda'ogaque' cheya_{la}' yesonxene' be_{ne}' nac dogualje Dios.

²⁵ Nach no'olen' gože'ne':

—Nezda' yid ben' ba gwlej Dios_{en}' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

²⁶ Nach Jesús_{en}' gože' no'olen':

—Neda' choe'lena' le' diža' naca' ben' žo' ca'.

²⁷ Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'.

²⁸ Nach no'olen' bocua'an che'e nis chen' na' beyeje' lo yežen' jayeže' bene' gualaž che'ca':

²⁹ —Le šo'o le na' to bene' ba gože' neda' yogo'te da' ba bena'. Ćše bengan' Cristo ben' chbezcho yedenabi'e?

³⁰ Na' besežaše' yežen' ja'aque' gan' chi' Jesúsen'.

³¹ Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

³² Na' Jesúsen' gože' legaque':

—Bi nezele de to yela' guagw chia'.

³³ Na' gose' lježe':

—ĆGague ba bedesesan bene' da' gwdagüe'?

³⁴ Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwsela' neda' cont gac yogo' da' chnalaže'.

³⁵ Le'e žale: “Ne' dech yetap bio' cont yedobe cosešen'.” Na' neda' chnia', le na' na' le'ele to coseš da' chyažje yedob na'a.

³⁶ De da' goncho na'a cont bene' yosozenague' che Diosen' na' gata' yela' mban chegaque' toli tocañe. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz.

³⁷ Diža' nga naquen da' li, žan: “Bene' yoble chaz na' bene' yoble chelap.”

38 Baḥ chsela' le'e šjaylaple gan' bi gozle, le le'e gonle cont yosozenag beṇe' xtiža' Diosen' dan' ba goseyixjue'e beṇe' yoble.

39 Na' ca nac beṇe' yež Sicar ga mbane Samaria, zane' gosejnilaže' Jesúsen' da' gosende' gwna no'olen': "Ba gože' neda' yogo' da' ba bena'."

40 Nachen' besežin beṇe' Sicaren' gan' chi' Jesúsen' gosata'yoede' le' yega'anlene' legaque', na' bega'ane' chope ža.

41 Na' beṇe' zanch gosejnilaže' Jesúsen' cate' gosende' diža' da' be' cuine'.

42 Nach gose'e no'olen':

—Baḥ chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' beṇachen' lo da' malen'.

Jesúsen' beyone' xi'in to beṇe' gwnabia'

43 Na' cate' goc chop ža, Jesúsen' len beṇe' ca' zjanaque' le' txen gosa'aque' jaya'aque' Galilea.

44 Le cuin Jesúsen' ba gwne' note'teze beṇe' cho'e xtiža' Diosen', bi chesonla'ancze beṇe' gualaž chen' le'.

45 Na' cate' besežine' Galilean' beṇe' gualaž čegaquen' bosolebe' Jesúsen' dan' ba besele'ede' yogo' da' güen da' bene' Jerusalénna' lo lnin', le lencze legaque' ja'aque' lnina'.

46 Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoa to beṇe' gwnabia' beṇe' chon žin che rey, na' chacšenchgüe xi'ine'.

47 Xa bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwneyoede' le' šeje' šjayene' xi'inen', le ba zoa gatbe'.

48 Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le chia'.

49 Nach ben' chon žin che reyen' gota'yoede' le' gwne':

—Bene', yo'ošca šlac bi'na' gat bi' chian'.

50 Na' Jesúsen' gože'ne':

—Beyej ližo', bi gat bi' chion'.

Nach gwyejle' bena' dan' gož Jesúsen' le' na' beze'e.

51 Ba zoa yežine' cate' jasešag xmose' ca' le' na' gose'ene':

—Ba beyac bi' chion'.

52 Na' gwñabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

53 Na' xaben' gocbe'ede' ca hor na'czen' gož Jesúsen' le' bi gat bi' chen'. Nach gwyejniłaže' Jesúsen', le' len yogo' bene' že' ližen'.

54 Da' nga goc yela' guac gwchop da' ben Jesúsen' šlac beze'e Judean' na' bežine' Galilea.

5

Jesúsen' beyone' to bene' nat late' cuerp che'

¹ Na' gwde to tiemp bžin ža goc yeto lni che neto' bene' Israel Jerusalénna', na' Jesúsen' gwyeje'.

² Jerusalénna' gała'ze cho'a puert che ze'e da' nyechj ciudan' dan' nzi' Puert che Xila' žia to ga

chož nis da' nzi' Betesda, na' ze gayo' chalšil cue'ej cuite gan' chož nisen'.

³ Na' beņe' zan beņe' güe' zjadie' chalšil ca', no beņe' lchol, no beņe' nxinj ni'e, no beņe' natsi' late' güeje cuerp čhegaquen'. Zjadie' chesebeze' batcan' ta nisen'.

⁴ Le tgüeje betj to angl na' bte' nisen', na' beņe' nechw beņe' cho'e lo' nisen' cheyož chta anglen' len, cheyacde' bite'tez yižgüe' che'ede'.

⁵ Na' cate' bžin Jesúsen' na' de to beņe' ba goc šino'šonechoa iz chacšende'.

⁶ Na' Jesúsen' ble'ede' ben' na' gočbe'ede' ba chac sša de' ca', na' gože'ne':

—¿Chaclažo' yeyaco'?

⁷ Na' beņe' güen' gože' Jesúsen':

—Beņe', nono zoa no co' neda' lo' nisen' cate' chdan. Na' šlac zya'a cont šo'a, beņe' yoble chy-obde' chetje' lo' nisen'.

⁸ Nach gož Jesúsen' le':

—Gwyas na' botobe xta'on na' gwda.

⁹ Na' la' beyacte bena' na' botob xte'en na' gwzola' chde'. Perw na' goquen to ža čhe Dios cate' bi de lsens gon neto' beņe' Israel žin.

¹⁰ Nach beņe' gwnabia' čhe neto' beņe' Israel gose'e bena' beyaquen':

—Ža čhe Dios na'a. Bi de lsens yeyoa' xta'ona'.

¹¹ Na' gož ben' legaue':

—Bena' beyon neda' gože'nda': “Botobe xtaon' na' gwda.”

¹² Nach gose'ene':

—¿Non' gož le': “Botobe xtaon' na' gwda”?

¹³ Na' ben' beyaquen' bi gwnezde' non' beyon le', le Jesúsen' benite' ladjo beņe' zan ca'.

14 Gwdechle Jesúsēn' bedilē' bena' beyaquēn' lo' yodao' blaon' na' gože' lē':

—Bač beyaco' n̄a'a, na' cheyalā' cuejyichjo' da' malen' bich gonon', cont bi gac chio' to da' malech.

15 Nach beza' bena' jatixjue'ede' beņē' gwnabia' che naciōn Israel cheton' gože' lēgaque' Jesúsna' ben' beyon lē'.

16 Da'nan' beņē' gwnabia' ca' gwzolao gosebe'na'ogüe' Jesúsēn' na' cheseyiljue' nacle yesone' yesote'ne' da' chone' yelā' guac ca' ža che Dios cate' bi de lsens gon neto' beņē' Israel žin.

17 Na' Jesúsēn' gože' lēgaque':

—X̄an' zoacze' chelalde' bate'teze na' lēcze ca' neda'.

18 Da'nan' goseyiljwlaže'che' nacle yesone' yesote' Jesúsēn', perw gague neche bi chone' can' ža ley gan' chgualan' che ža che Dios na'zen', san lēcze da' gwne' Diosen' naque' X̄e', lē zejen toz ca zaque' len Diosen'.

Yelā' chnabia' da' nape Xi'īn' Diosen'

19 Na' gož Jesúsēn' lēgaque':

—Chnia' le'e to da' zejen, bibi chac gona' to gualaza'. Con da' chle'eda' chon X̄an', len̄na' chona', na' bite'teze da' chon X̄an', len̄na' chona', lē neda' naca' Xi'īne'.

20 Chaque X̄an' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele.

21 Ca X̄a' Diosen' chosbane' beņē' ladjo beņē' guat ca', ca'cze chona' neda' naca' Xi'īne', chnežjua' yelā' mban che note'tez beņē' chbeja' cont gata' yelā' mban chegaque'.

22 Na' Xan' bi chchoglagüe' che ne to bene' še nape' doła', san ba gwlo'e lo na' choglagua' che yogo' beñač še non' nap doła'.

23 Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

24 'Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban čegaque' toli tocaṇe. Na' bi yesezaca'zi'e toli tocaṇe da' bi chesejnilaže'ne'. Bich zjanaque' ca bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neče ba chesejnilaže'ne'.

25 Chnia' le'e to da' zejen, gwžin ža cate' bene' zjanac ca bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban čegaque' toli tocaṇe, na' bač chzolao chac ca' na'a.

26 Xa' Diosen' zoacze' toli tocaṇe na' chone' cont zjamban beñačen', na' lecze ba bene' cont neda' naca' Xi'ine' zoa' toli tocaṇe na' chona' cont zjamban bene'.

27 Na' lecze ba bene' neda' yela' chnabia' cont nia' non' nap doła', le ba gwsele' neda' golja' beñač.

28 Bi yebanele dan' chnia' nga, le gwžin ža cate' yogo'lol bene' guat že' lo' ba yesende' cate' yol güiža'ne'.

29 Na' bene' ca' goson da' güen šlac gosebane' yesyechoje' na' yesebane' toli tocaṇe. Na' bene' ca' goson da' mal šlac gosebane' yesyechoje' na' yesezaca'zi'e toli tocaṇe.

Jesúsen' bzejni'ide' nape'yela' chnabia'

³⁰ 'Bibi gac gona' to gualaza'. Chzenaga' bin' ža Xan' cont nia' che benachen' noe' nap dola'. Na' dan' nia' gac che to to bene' naquen da' cheyala' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwsela' neda'.

³¹ Šaca' toz neda' chgua'a da' bali non' naca', bi naquen to da' šejle'le.

³² Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le.

³³ Bač gwsela'le bene' lao Juanna' cont jasenabde' le' nac nac chia', na' Juanna' be'e diža' li non' naca'.

³⁴ Perw neda' bi chyažjda' diža' da' güe' ne to benach chia'. San chnia' da' quinga cont le'e šejle'le chia' na' gata' yela' mban chele toli tocanē.

³⁵ Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsed blo'eden'.

³⁶ Na' de to da' choe' xtiža' da' zaca'ch ca diža' da' choe' Juanna' chia': chona' yogolo da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'.

³⁷ Nach Xan' ben' gwsela' neda' lecze cho'e xtižan', la'czla' biņa' yenele can' chnen' na' biņa' le'ele can' naquen'.

³⁸ Xtižen' biņa' šon' lo' yichjlažda'olen', le bi chejnilaže'le neda' naca' ben' gwselen'.

³⁹ Chsedyane'le gan' nyoj Xtiža' Diosen', le chaquele gaple yela' mban toli tocanē neche chsedlen. Na' da' ca' chsedlen' zjanyojen chsoen' xtiža'.

40 Perw bi chaclaže'le šejnilaže'le neda' cont gata' yela' mban chele toli tocanē.

41 'Na' neda' bi chyažjda' yesena beṇaḅhen' naca' bene' zaca'.

42 Nombi'a le'e na' nezda' bi chaquele Diosen'.

43 Xan' ba gwsele' neda' chona' con da' že', perw bi chejle'le chia'. Na' cate' za'ac beṇe' cheson con bi da' ža xbab chegacze', nachle chejle'le chegaque'.

44 ¿Nacxe gac šejle'le chia'? le chzelaže'le yesena beṇe' chonle güen, na' bi chzelaže'le gonle cont toz Diosen' ne' chonle güen.

45 Bi gonle xbab neda' gwcuiša' le'e lao Xan'. Da' Moisésen' hcuiše' le'e lagüen', le chsedchguale dan' bzojen' chaquele cont soale binlo len Diosen', perw bi chejle'le xtižen'.

46 Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'.

47 Na' da' bi chejle'le dan' bzoj da' Moisésen', ¿nacxe gonle šejle'le bi dan' žia' le'e?

6

Jesúsen' bguagüe' gayo' mil beṇe'

(Mt. 14:13-21; Mr. 6:30-44; Lc. 9:10-17)

1 Gozde goc ca' Jesúsen' gwyeje' yešla'a nisdao' che Galilea len beṇe' ca' zjanaque' le' txen. Na' nisdao' na' lecze nzin' Nisdao' Tiberias.

2 Na' beṇe' zan zjanao' Jesúsen' da' ba besele'ede' yela' guac dan' chonen' cheyone' beṇe' güe' ca'.

3 Na' gwloe Jesúsen' to lo ya'a len beṇe' ca' zjanaque' le' txen na' gosebi'e.

4 Na' da' yoble ba zoa gala' lni che neto' beṇe' Israel da' nzi' pascw.

⁵ Na' cate' gw_na' Jesús'en' ble'ede' be_ne' zan ba zjanao' le' na' gože' Felipen':

—¿Gaxe si'cho da' yesagw yogo' be_ne' quinga?

⁶ Gwne' ca' yešque bi na Felipen', le Jesús'en' nezeczedede' naquen' gone'.

⁷ Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesús'en' txen le Andrés na' naque' be_ne' biše' Simón Pedro. Na' Andrés'en' gože' Jesús'en':

⁹ —Nga zoa to bi' byo dao' na' de gayo' yetextil de cebada chebe' na' yechope be_l ya'a. Perw ¿bi de gon da' quinga? le be_ne' zanna' že' nga.

¹⁰ Nach Jesús'en' gože' be_ne' ca' zjanaque' le' txen: —Le ye' yogo' lole' yesebi'e.

Dechgua yixye latjen', na' gosebe' be_ne' ca' lo yixyena', ca do gayo' mil be_ne' byo, bi cuent no'ole len bidao'.

¹¹ Nach gwxi' Jesús'en' yetextil ca', na' beyož be'e yela' choxc_len che Diosen' bnežjuen' be_ne' ca' zjanaque' le' txen cont goseyisen' len be_ne' ca' zjachi' na'. Na' lecz ca' bene' len be_l ya'a ca'. Na' goso'e to toe' con ca'te'te' gosac_laže' gosagüe'.

¹² Na' beyož gosagüe' ca'te'te' goseljde', Jesús'en' gože' be_ne' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

¹³ Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šižinw žome.

¹⁴ Cate' be_ne' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho seła' Diosen' yežlio nga.

¹⁵ Na' cate' Jesúsen' gočbe'ede' ba zoa yeseče'exoxje' le' cont yesone' le' rey čhegaque', nach gozze'e gozeje' ya'adaon' toze'.

Jesúsen' gwze'e lo nisdaon'
(Mt. 14:22-27; Mr. 6:45-52)

¹⁶ Cate' ba gwxin, bene' ca' zjanaque' Jesúsen' txen jaya'aque' cho'a nisdaon'.

¹⁷ Na' besyeyo'e to lo' barcw zjaya'aque' ciuda Capernaum. Ba goł na' Jesúsen' biņa' yežine'.

¹⁸ Na' chas chata' chac nisdaon' le chečhchgua be'.

¹⁹ Ba goc sša zjaya'aque' len barcon' lo nisdaon' cate' besele'ede' ba zjayda Jesúsen' cheze'e lo nisen' gala'ze gan' zej barcon'. Na' besežebe'.

²⁰ Na' gože' legaque':

—Nedan', bi žeble.

²¹ Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdaon' gan' zjaya'aquen'.

Bene' zan chesyeyiljue' Jesúsen'

²² Na' beteyo bene' zan bene' ca' besyega'an yešla'a cho'a nisdaon' gosache'ede' nono Jesúsen' nła' na' gosache'ede' bibi barcw yoble gota'ch san toga dan' besyeyo'o bene' ca' zjanaque' Jesúsen' txen, na' zjaņezde' Jesúsen' bi beyo'e len legaque' lo' barcon'.

²³ Nach besežin barcw da' za'ac ciuda Tiberias gala'ze gan' gosagüe' yetextilen' caten' beyož be' Xancho Jesúsen' yela' choxcen čhe Diosen'.

24 Na' cate' gota'bia' nono Jesúsén' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsén' do na'.

Yela' guagw da' chnežjon bene' yela' mban toli tocanē

25 Na' cate' bene' zan ca' besyeželde' Jesúsén' yešla'ale nesdaon' nach gose'e le':

—Maestrw, ¿batca' bla'o nga?

26 Na' Jesúsén' gože' legaque':

—Chnia' le'e to da' zejen, cheyiljwle neda' neče dan' gwdagwle ca' beljele na'zen', gague neče chejle'le chia' lagüe ba ble'ele yela' guac ca' ba benan'.

27 Bi cheyala' cuecyichjle gata' da' ye'ej gagwle da' chbiayi', san cuecyichjle gata' da' gon yela' mban chele toli tocanē. Diosen' gwsele' neda' golja' benach na' neda' gona' to da' ye'ej gagwle cont gata' yela' mban chele toli tocanē. Na' Xa' Diosen' ba blo'e naca' ben' ba gwsele'.

28 Na' gose'ene':

—¿Bi cheyala' gonto', cont yebe Diosen' neto'?

29 Na' gož Jesúsén' legaque':

—Da' nga gonle cont yebe Diosen' le'e, šejnilaže'le neda' naca' ben' gwselen'.

30 Na' gose'e Jesúsén':

—¿Bi yela' guac gono' še ca' cont le'eto' na' šejnilaže'to' le'? ¿Bi gono'?

31 Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' chegaquen', žan: "Yela' guagw da' za' yaban' be'e legaque' gosagüe'."

32-33 Nach Jesúsén' gože' legaque':

—Chnia' le'e to da' zejen, gague da' Moisésen' bnežjue' da' xoxxta' ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe'na', san de to yela' guagw da' ba gwseła' Diosen' na'a da' za' yaban' na' betjen yežlion', na' chnežjon yela' mban che note'teze bene' chesagw len.

³⁴ Nach bene' ca' gose'e le':

—Bene', benšca neto' yela' guagon' žo' ca' gagw-ton' yogo' ža.

³⁵ Nach Jesúsena' gože' legaque':

—Neda' naca' yela' guagw da' chnežjon bene' yela' mban toli tocaṇe. Note'teze bene' yosozenag chia' na' yesejnilaže' neda', guata' da' chyažje yichjlažda' ogaque' toli tocaṇe.

³⁶ Na' ba gwnicza' le'e, la'czła' ba ble'ele neda' bi chejnilaže'le neda'.

³⁷ Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'.

³⁸ Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwseła' neda'.

³⁹ Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'.

⁴⁰ Xan' chaclaže' yogo' loł bene' yesejni'ide' non' naca' na' yesejnilaže' neda' cont gwnežjue' legaque' yela' mban toli tocaṇe, na' neda' yosbana' legaque'

ladjo be_{ne}' guaten' še ba gosate' cate' žin ža te che yežlion'.

⁴¹ Na' zan be_{ne}' Israel gualaž četo' legacze' be-sežeše' che dan' gwna Jesúsen': "Neda' naca' ye_{la}' guagw da' za' yaba."

⁴² Gosene':

—¿Gague bengan' Jesús xi'in José? Nombia'cho xaxna' benga. ¿Bi dižan' cho'e že' ze'e yaba betje' yežlio?

⁴³ Nach Jesúsen' gože' legaque':

—Bich žešele chia'.

⁴⁴ Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'.

⁴⁵ Le'e gan' bosozoj be_{ne}' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

⁴⁶ 'Bi nacho zoa be_{ne}' ba ble'ede' Xan'. Toza' neda' ba ble'eda'ne', le za'a gan' zoen'.

⁴⁷ Chnia' le'e to da' zejen, be_{ne}' chesejnilaže' neda', de ye_{la}' mban čegaque' toli toca_{ne}.

⁴⁸ Neda' naca' ye_{la}' guagw da' chnežjon ye_{la}' mban toli toca_{ne} che benachen'.

⁴⁹ Da' xoxxta'ocho ca' gosagüe' ye_{la}' guagw da' nzi' maná šlac gosenite' latje dašen', na' bia'cze gosat yogüe'.

⁵⁰ Neda' cho'a diža' che to ye_{la}' guagw da' za' yaban' na' be_{ne}' chagw len bi gate'.

⁵¹ Neda' naca' ye_{la}' guagw dan' za' yaban' dan' nsa' ye_{la}' mban toli toca_{ne}. Be_{ne}' šejnilaže' neda',

bane' toli tocaṇe. Na' yela' guagw da' chnežjua' cont gata' yela' mban che beṇachen' naquen cuerp chia'.

52 Nach bene' Israel gualaž cheto' ca' legacze' besežeše', goseṇe' che':

—¿Nacxe gone' gone' cuerp chen' gagwchon?

53 Jesúsen' gože' legaque':

—Chnia' le'e to da' zejen, Diosen' gwsele' neda' golja' beṇach, na' še bi chagwle cuerp chian' na' še bi che'ejle xchenan', bi de yela' mban chele toli tocaṇe.

54 Beṇe' chesagw cuerp chian' na' chese'eje' xchenan' de yela' mban chegaque' toli tocaṇe, na' še ba gosate', cate' te che yežlion' yosbana' legaque' ladjo beṇe' guat ca'.

55 Le cuerp chian' naquen dogualje yela' guagw, na' xchenan' naquen dogualje da' ye'ejle.

56 Beṇe' ca' chesagw cuerp chia' na' chese'eje' xchenan' de yela' mban chegaque' toli tocaṇe, na' zjanaque' txen len neda' na' neda' naca' txen len legaque'.

57 Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len beṇe' yesagw cuerp chian', yesenite' toli tocaṇe dan' zjanaque' txen len neda'.

58 Cuerp chian' naquen yela' guagw da' za' yaba. Na' len bi naquen ca da' gosagw da' xoxzta'ocho ca' latje dašen', le beṇe' gosagw len bia'cze gosate'. Na' beṇe' chesagw yela' guagw dan' žia' ca', yesenite' toli tocaṇe.

59 Jesúsen' bsed blo'ede' da' ca' lo' yodao' che beṇe' Israel gualaž cheto' ca' da' zoa Capernaum.

Xtiža' Jesúsen' chnežjon yela' mban toli tocanē che bene' chosozenag chen

⁶⁰ Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

⁶¹ Gocbe'e Jesúsen' cheseñie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'?

⁶² ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwseła' Diosen' golja' benach.

⁶³ Spiritw chian' chnežjon benachen' yela' mban, na' cuerp chian' bi gac gonen ca'. Diža' dan' bach bia' len le'e zjazacan' len yichjlažda' olen' cont banle toli tocanē še šejle'le chen.

⁶⁴ Perw ne' nita' balle bi chejle'le.

Jesúsen' gwne' ca' le gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo na' bene' ca' chesegue'ede' le'.

⁶⁵ Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

⁶⁶ Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'.

⁶⁷ Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle'?

⁶⁸ Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen.

⁶⁹ Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocanē.

⁷⁰ Na' Jesúsen' gože' legaque':

—Ba gwleja' le'e šižiŋwle cont zoale len neda' na' nezda' tole chzenagle che gwxiyen'.

⁷¹ Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo na' bene' ca' chesegue'e le', na' Judasen' naque' to bene' šižiŋw ca'.

7

Bene' biše' Jesúsen' bi gosejnilaže' le'

¹ Gwde na' Jesúsen' gwdacze' bsd blo'ede' ben' že' distritw Galilean'. Bich goclaže' šejche' Judean', le bene' gwnabia' che nación Israel cheton' že' na' cheseyiljue' nacle yesone' yesote'ne'.

² Na' ba zoa gala' lni che neto' bene' Israel da' nzi' Lni che Ranšw Yix.

³ Na' bene' biše' Jesúsen' gose'ene':

—Bitw yega'año' nga. San gwyej Judean' cont bene' ca' chosozenag chio' yesele'ede' yela' guac dan' chonon'.

⁴ Note'teze bene' še chaclaže' yesache'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

⁵ Bene' biše' Jesúsen' gose'ene' ca', le ne legaque' bi gosejnilaže'ne'.

⁶ Nach gož Jesúsen' legaque':

—Biṇa' žin ža ša'a, san le'e guac šja'acle bate'teze.

⁷ Beṇe' ca' bi zjanombi'e Diosen' bi gac yesegue'ede' le'e, san chesegue'ede' neda', le chzejni'ida'ne' chesone' da' xinj.

⁸ Le šja'ac lṇin'. Neda' bi sa'a ṇa'a, le biṇa' žin ža chia'.

⁹ Beyož gože' legaque' ca' bega'aṇe' Galilean' yeto chop ža.

Jesúsen' gwyeye' Jerusalén gan'yo'o lṇin'

¹⁰ Nach gwde gosa'ac beṇe' biše' ca' zja'aque' lṇin' gwza' Jesúsen' len beṇe' ca' zjanaque' le' txen zja'aque' lṇin', perw bi ja'aque' can' nla'ze san bagaše'ze.

¹¹ Na' beṇe' gwnabia' che nación Israel cheton' že' Jerusalénṇa' besyeyiljue' le' lo lṇin', chesene':

—¿Gaṇxe bena'?

¹² Na' beṇe' ca' zjandop zjanžag lo lṇin' šižize goso'e diža' che Jesúsen', na' gague toze ca gosene'. Bale' gosene': “Naque' beṇe' güen”, na' bale' gosene': “Bi naque', chonlede' beṇe'.”

¹³ Na' goso'e diža' šižize che Jesúsen', le yogo'ze beṇe' chesežebe' bi yesone beṇe' gwnabia' ca' legaque' še yesache'ede' cheso'e diža' güen che Jesúsen'.

¹⁴ Na' do gašje zej lṇin' cate' gwyej Jesúsen' gan' zoa yodao' blao che neto' beṇe' Israel na' gwzolao chsed chlo'ede'.

¹⁵ Na' besyebane beṇe' gwnabia' ca', gosene':

—¿Nacxeṇen' da' zan neze benga? le gague bi nseden'.

¹⁶ Na' Jesúsen' gože' legaque':

—Dan' chsed chlo'edan' bi naquen xbab čhecza', san naquen xbab čhe be_{ne}' gwse_{la}' neda'.

17 Note'tez be_{ne}' chesaclaže' yesone' can' chaclaže' Dios ben' gwse_{la}' nedan', guacbe'ede' še dan' chsed chlo'edan' zan' čhe Dios o še naquen da' chaljlaže'za'.

18 Cate' to be_{ne}' chsed chlo'ede' xbab čhecze', cheyljue' nacle gone' cont gacxene'. San cate' to be_{ne}' chaclaže' gacxen be_{ne}' gwse_{la}' le', nezecho xtižen' naquen da' li na' bi chziye'e.

19'Da' Moisésen' be_{ne}' le'e ley dan' nsedlen' perw ne tole bi chon_{le} can' žanna'. ¿Bixčhen' cheyljwle nacle gon_{le} gotlenda'?

20 Be_{ne}' ca' že'na' gose'ene':

—Yo'o da' xigüen', nan' chol ch_{ne}nošo'. ¿No chaclaže' got le'?

21 Jesús en' gože' legaque':

—Toz yela' guac da' bena' ža čhe Dios cate' bi de lsens gon chio' be_{ne}' Israel žin, na' yogo'le chebanele.

22 Da' Moisésen' bene' mandadw soacho señw dan' že' circuncisión (la'cz_{la}' bi gwzolao señon' len le' san len da' xoxxta'ocho ca' be_{ne}' gwnita' can'te), na' da'nan' chzoale bi' byo dao' ca' señwna' ža čhe Dios.

23 Can' naquen, la'cz_{la}' še naquen ža čhe Dios, chzoale no bi' byo dao' señw cate' chaquebe' xono' ža cont chon_{le} can' ža ley dan' bzoj Moisésen', na' ¿bixčhen' chža'ale neda' dan' ba beyona' to be_{ne}' güe' ža čhe Diosen'?

24 Bi cheyala' yosbaga'le be_{ne}' čhe da' chle'ele chone', le bi nezele še chazlaže' Diosen' can' chone',

san le nabyane' cont nezele bi ža Diosen', nachen' gache'ele non' cheyla' yosbaga'le.

Jesúsen' gwne' ze'e gan' zoa Diosen'

²⁵ Nach to chope bene' Jerusalén ca' gosene':

—¿Gague benga ben' chesyeyiljue' cont yesote'ne'?

²⁶ Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwn-
abia' checho xbab le naque' Cristo ben' chbezcho yedenabia'?

²⁷ Perw nezecho ga bene' benga, na' cate' yid Criston' nono yeseneze ga bene' le'.

²⁸ Jesúsen' chsed chlo'ede' chalšil che yodao' blao cate' gosene' ca'. Nach gwne' zižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'ne'.

²⁹ Neda' nombi'ane', le za'a gan' zoen' na' le' gwsele' neda'.

³⁰ Na' da' gwne' ca' bal bene' gosaclačže'chgüe' yesezene' le', perw nono gwzen le' da' biña' žin ža gague' lo na'gaquen'.

³¹ Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' ¿gonche' yela' guac da' zaca'ch ca da' chon benga?

Bene' chesape' yodao' blaon' ja'aque' cont šjasexene' Jesúsen'

³² Bene' fariseo ca' gosende' diža' cheso'e bene' ca' che Jesúsen'. Da'nan' bosoxi'e len bene' ca' zjanac b̄xoz gwnabia' che nación Israel cheton'

na' gosesele' be_{ne}' chesape' yodao' blaon' cont šjasekene' Jesúsen'.

³³ Nach Jesúsen' bsed blo'echde' be_{ne}' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwsela' neda'.

³⁴ Na' yeyiljwle neda' na' bi yeželele neda', le gan' soan' bi gac yidle.

³⁵ Nach be_{ne}' gwnabia' che nación Israel cheton' gose' lježe':

—¿Gan' chacde' yeyeje' ga bi yeželechone'? ¿Yeyeje' gan' zjanaslas be_{ne}' gualaž checho ladjo be_{ne}' griego ca' na' gwsed gwlo'ede' legaue'?

³⁶ ¿Bi zejen dan' gwnen': “Yeyiljwle neda' na' bi yeželele neda' na' gan' soan' bi gac yidle”?

Jesúsen' be'e diža' che Spiritw che Diosen'

³⁷ Ža cate' zelao chesone' l_nin' naquen ža xench, na' Jesúsen' zeche' chsed chlo'ede' na' gw_{ne}' zižje, gwne':

—Note'tezle še lo' yichjlažda'olen' nacle ca be_{ne}' chbillaže', cheyala' šejnilaže'le neda' na' gona' le'e yela' mban toli tocanē, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to be_{ne}' chbillaže'.

³⁸ Le'e chejnilaže'le neda', gac chele can' ža Xtiža' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

³⁹ Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' bi_{na}' yedesoan lo' yichjlaždao' be_{ne}',

le bina' gac yogo' da' cheyała' gac cont gacbia'
Jesúsen' naque' beṇe' zaca' juisiyw.

Gosaque' chople neche Jesúsen'

40 Beṇe' ca' chosozenag xtiža' Jesúsen' bałe'
gosene':

—Da' li bengā naque' ben' choe' xtiža' Diosen'
ben' naquen yide'.

41 Na' yebałe' gosene':

—Bengā Criston' ben' naquen yedenabia'.

Perw yebałe' gosene':

—¿Bixe nācho beṇe' Galilea ba gwlej Diosen' cont
yedenabi'e chio'?

42 Xtiža' Diosen' da' nyojen žan Criston' ben'
yedenabi'e choje' lo diaža che da' rey David na'
gaque' beṇe' Belén gan' nac laž da' David.

43 Can' goc beṇe' ca' gosaque' chople neche
Jesúsen'.

44 Na' bałe' gosacłaže' yesezene'ne', perw nono
gwzen le'.

*Beṇe' gwnabia' che nación Israelen' bi gosejle'e
che Jesúsen'*

45 Na' beṇe' chesape' yodao' blaon' jaya'aque'
gan' nita' b̄xoz gwnabia' ca' len beṇe' fariseo
ca', le beṇe' can' gosesele' legaque' cont yesezene'
Jesúsen'. Na' beṇe' ca' gose'e legaque':

—¿Bixchen' bi nche'elne'?

46 Na' beṇe' chesape' yodao' blaon' gose'ene':

—Biṇa' yeneto' beṇe' cho'e diža' güen ca dan'
choe' bena'.

47 Nach beṇe' fariseon' gose'e legaque':

—¿Lente le'e ba gwxiye'e?

48 Ne toz neto' nacto' be_{ne}' fariseo bi_{na}' šej_{le}'to' xtižen' na' ne_{ca} be_{ne}' gwnabia' che_{chon}', ne toze' bi_{na}' šej_{le}'e xtižen'.

49 Perw be_{ne}' quinga že' nga bi zjanombi'e ley dan' bzoj da' Moisésen' na' ba zjambiaye'e, da'n_{an}' chesej_{le}'e xtižen'.

50 Na' Nicodemo ben' gwyej lao Ješusen' šeže'le naque' txen len be_{ne}' gwnabia' ca'. Na' Nicodemon' gože' lega_{que}':

51 —Ley che_{chon}' bi choen' latje chogla_{ocho} che to be_{ne}' ba ben da' mal še bi_{na}' güe'e diža' naquen' goc na' še bi_{na}' nezecho bi dan' bene'.

52 Nach yezica'chle be_{ne}' gwnabia' ca' gose'e le':
—¿Leno' le' ba beyaco' be_{ne}' Galilea? Bsed Xtiža' Diosen' da' nyojen na' nezdo' ne to be_{ne}' choe' xtiža' Diosen' ca' na' choje' Galilean'.

53 Nach besyeya'ac to toe' jaya'ac ližga_{que}'.

8

No'olen' besyedole'de' len xtoe'

1 Na' Jesús_{en}' gwyeje' ya'a da' nzi' Ya'a Olivos.

2 Na' beteyo cate' gwyeni' gwyeje' yodao' blaon' da' yoble na' yogo' be_{ne}' ca' že' na' gosebigue' lagüen' na' gwchi'e na' gwzola_{güe}' chsed chlo'ede' lega_{que}'.

3 Nach be_{ne}' chososed chosolo'e ley dan' bzoj da' Moisésen' na' be_{ne}' fariseo ca' jasesane' to no'ole be_{ne}' besyedole'de' len xtoe'. Na' bosozече' le' gachol be_{ne}' ca' chosozenag che Jesús_{en}'.

4 Na' gose'e Jesús_{en}':

—Maestrw, no'ole nga ba bedole'to' delene' xtoe'.

⁵ Na' ley chechon' da' bzoj Moisésen' žan cheya_{la}' gotcho no'ol ca' cheson ca' gwche_lchone' yej. Na' ¿bi žo' le'? ¿bix cheya_{la}' gonechone'?

⁶ Gose'e Jesúsen' ca' da' gosaclaže' yesebeje' le' diža' da' yosochine' yesagüe' xya che'. Na' Jesúsen' con bcheque' bzoje' lo yon' len xbene'.

⁷ Na' be_{ne}' ca' gosone' byen gosenabchde' le' bi že'. Nach Jesúsen' bebe'šagüe' na' gože' legaque':

—Guaque con note'tezle bi de xto_{la}'le solaole gwchellene' yejen'.

⁸ Nach bcheque' da' yoble bzojche' lo yon'.

⁹ Na' be_{ne}' ca' zjanche' no'olen' cate' gosende' can' gož Jesúsen' legaque', zjanezde' lecze ba zjanon-cze' da' xinj, nach tgüje tgüje' besyechoje' gwzolaotequen' len be_{ne}' golech na' bžinten len be_{ne}' xcuide'ch, nach bega'an yetoze no'olen' len Jesúsen' gan' že' be_{ne}' ca' chsed chlo'ede'.

¹⁰ Nach Jesúsen' bebe'šagüe' da' yoble na' ble'ede' noch no be_{ne}' ca' zjan_{la}' na' gože' no'olen':

—No'ole, ¿ganxe be_{ne}' ca' chosocuiš le'? ¿Ne toe' bi be_n le' castigw?

¹¹ Na' no'olen' gože'ne':

—Ne toe', be_{ne}'.

Na' Jesúsen' gože'ne':

—Ne neda' bi go_{na}' le' castigw. Beyej na' bich gono' da' malen'.

Jesúsen' nse'e be'ni' che yichjlaždao' benach

¹² Jesúsen' gozo'e diža' da' yoble chzejni'ide' be_{ne}' ca' že' na', gwne':

—Neda' nsa'a be'ni' che yichjlaždao' benachen'. Be_{ne}' zjanaque' neda' txen bich zjanaque' ca be_{ne}' yichjlaždao' lchol be_{ne}' cheson da' xinj, san lo'

yichjlažda'ogaque' naquen ca to da' yo'o be'ni'.
Da'nan' ba de yela' mban čhegaque' toli tocañe.

13 Nach beñe' fariseo ca' gose'e Jesúsen':

—Cho'o diža' čhe cuino' naco' bene' zaca', na'
da'nan' bi naquen to da' yesejle' bene'.

14 Na' gož Jesúsen' legaque':

—La'czla' cho'a diža' čhe cuina', xtižan' naquen
da' li. Neda' nezda' gan' gwza'a na' gan' yeya'a,
perw le'e bi nezele gan' za'a na' gan' yeya'a.

15 Le'e chosbaga'le neda' con can' chon
beñachen' xbab, san neda' nono chosbaga' bi
da' yosbaga'.

16 Perw na' šaca' bi da' yosbaga' bene', gonan'
ca cheyala', le bibi de da' chona' to gualaza', san
chona' dan' ža Xan' ben' gwseła' neda'.

17 Ley čechon' dan' chsedlen' žan cheyala'
šejle'cho cate' chedił diža' da' chesoe' čope tes-
tigw.

18 Na' nac čopto' choe'to' xtiža': neda' cho'a
diža' čhe cuina' na' Xan' ben' gwseła' neda' lecze
cho'e diža' chia'.

19 Na' gose'ene':

—¿Gaxe zoa xaon'?

Na' gwna Jesúsen':

—Ne neda' ne Xan' bi nombia'le. Šaca' nombia'le
neda' lecze nombia'le Xan'.

20 Diža' ca' bsd blo'e Jesúsen' cate' ze' gała'ze gan'
cheseğüe'e mechw lo' yodao' blao čhe neto' bene'
Israel. Na' nono gwzen le', le biña' žin ža gaque' lo'
na' beñe' cheseğüe'ede' le'.

*Jesúsen' gože' legaque' bi gac šjaya'aque' gan' yeye-
jen'*

21 Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le bina' yetinjele xtoła'len' cate' žin ža gatle.

22 Na' da' gwne' ca' bene' gwnabia' che nación Israel cheton' gosene':

—¿Yeyot cuinen' že' gan' yeyejen' bi gac šejcho?

23 Nach Jesúsen' gože' legaque':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'.

24 Da'n'an' gwnia' bina' yetinjele xtoła'len' cate' žin ža gatle. Le še bi šejle'le neda' naca' doxen can' gwnian', gatle bina' yetinjele xtoła'len'.

25 Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'.

26 Ne' dech da' zan da' nia' cont gwzejni'ida' le'e naple doła'. Perw bene' gwsela' neda' nezde' yogo'loł na' cho'e diža' li, na' neda' choe'lena' benachen' diža' da' ba benda' gwne'.

27 Bene' gwnabia' ca' bi gosejni'ide' choe'lene' legaque' diža' che Xe' Diosen'.

28 Nach Jesúsen' gože' legaque':

—Cate' ba gwde gwłisle neda' to le'e yag, neda' naca' bene' gwsela' Diosen' golja' benach, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni'i Xan' neda', lenna' žia'.

29 Xan' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

³⁰ Na' šlac Jesúsen' choe'lene' be_{ne}' ca' dižan' nach be_{ne}' zan gosezolao chesejnilaže' le'.

Be_{ne}' ca' chnabia' da' malen' yichjlažda'ogaquen'

³¹ Nach Jesúsen' gože' be_{ne}' gualaž čheto' ca' bač gosezolagüe' chesejnilaže'ne':

—Še soaczle gon_{le} can' ba gwnian', gwlo'en da' li nacle txen len neda'.

³² Na' še soaczle gon_{le} can' ba gwnian', nachen' šejni'ile diža' li čhian' na' gaclenen le'e cont yechojle lo na' da' chnabia' le'e.

³³ Ba_l be_{ne}' ca' gose'e Jesúsen':

—Neto' nacto' diaža čhe da' Abrahanna' na' nono na' soa be_{ne}' nabia' neto'. ¿Bixčhen' žo' yechojto' lo na' da' chnabia' neto'?

³⁴ Na' gož Jesúsen' legaque':

—Chnia' le'e to da' zejen, yogo' be_{ne}' cheson da' xin_j zjanaque' lo na' da' mal da' chnabian' legaque'.

³⁵ Be_{ne}' zoa liž xan xšine' bi naque' xi'in ben' gan' chone' žin_{na}', san šlož güejze zoe' txen len legaque' len bi da' chesone'. San be_{ne}' golje' txen len le', bate'teze zoe' len legaque'.

³⁶ Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xan_{le}.

³⁷ Nezda' nacle diaža čhe da' Abrahanna', perw bia'cze cheyiljwlaže'le nac gon_{le} cont gotle neda'. Na' chon_{le} ca' da' bi chzenagle xtižan'.

³⁸ Neda' cho'a diža' čhe da' ca' ba ble'eda' cate' zoa' cuit Xan', na' le'e lecze chon_{le} da' ba benele gwna xalen'.

³⁹ Nach be_{ne}' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'.

⁴⁰ La'czla' ba bzejni'ida' le'e diža' li da' benda' gwna Diosen', bia'cze cheyiljwlaže'le nac gonle gotle neda'. Da' Abrahanna' bi bene' can' chonlen'.

⁴¹ Toz can' chonle len xalen'.

Nach beņe' ca' gose'e le':

—Toz Diosen' naque' Xato' na' bi chzenagto' che nochle beņe'.

⁴² Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'.

⁴³ ¿Bixchen' bi chejni'ile dan' chnia' le'e? Nezda' bi chejni'ile dan' bi chaclaže'le gwzenagle chia'.

⁴⁴ Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet beņe' cate' gwxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len.

⁴⁵ Na' neda', da' cho'a diža' li, bi chejle'le chia'.

⁴⁶ Bibi da' mal nona' na' da'nan' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'?

⁴⁷ Beņe' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

⁴⁸ Nach be_{ne}' gwnabia' che naci_on Israel che_{ton}' gose'e Jes_usen':

—Can' ba gwnaczto' nacia'cze naco' txen len be_{ne}' Samaria ca' na' yo'o to da' xig_ue' lo' yichjla_zda'oguo_n' chonen ga chol ch_{ne}nošo'.

⁴⁹ Jes_usen' gože' lega_{que}':

—Bi yo'o da' xig_uen' lo' yichjla_zda'ogua', san chonxena' Xan' na' le'e ch_{ne}le chia'.

⁵⁰ Bi chyiljua' no gonxen neda', perw zoa Xan' chaclaže' be_nachen' yesonxene' neda' na' Xan' choglag_uen' chele nape dola' da' ch_{ne}le chia'.

⁵¹ Chnia' le'e to da' zejen, note'teze be_{ne}' yosozenague' xti_zan', guata'cze yela' mban che' toli toca_{ne}.

⁵² Nach da' yoble be_{ne}' gwnabia' ca' gose'e le':

—Nach beyo_z gw_{ne}zeto' yo'o to da' xig_ue' lo' yichjla_zda'oguo_n' chonen ga chol ch_{ne}nošo'. Ba got da' xozxta'ocho Abrahanna', na' len be_{ne}' ca' gosoe' xti_za' Diosen' cani' lecze ba gosate', na' ch_{ne}nošo' žo' be_{ne}' chosozenag xti_zon' gata' yela' mban che' toli toca_{ne}.

⁵³ ¿Chacdo' zaca'cho' ca da' xozxta'ocho Abrahanna' len be_{ne}' ca' gosoe' xti_za' Dios be_{ne}' ba gosat? ¿Noxen' chacdo' naco'?

⁵⁴ Gož Jes_usen' lega_{que}':

—Šaca' chonxen cuina' bibi zejen, perw Xan' ben' žale naque' Dios ben' chejnilaže'le chonxene' neda'.

⁵⁵ Le'e bi nombia'ln'e', san neda' nombi'ane'. Šaca' nia' bi nombi'ane' gaca' be_{ne}' g_uenlaže' can' naclena'. Perw neda' nombi'ane' na' chzenaga' xti_zen'.

⁵⁶ Da' Abrahanna' ben' žale nac xozxta'ole be-bechgüede' gwnezde' le'ede' ba za'a len beñachen' na' zoe' mbalaz ba ble'eden'.

⁵⁷ Na' gose' bene' blao che nación Israel cheton' le':

—Bina' gacdo' šiyon iz. Chñenošo' žo' ba ble'edo' Abrahanna'.

⁵⁸ Jesúsen' gože' legaque':

—Chnia' le'e to da' zejen, ba zoacza' neda' cate' bina' galje Abrahanna'.

⁵⁹ Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosacbe'ede' cate' bedie' ladjogaque'.

9

Jesúsen' bene' cont ble'e to bene' golje' nchole'

¹ Txen zej Jesúsen' len bene' ca' zjanaque' le' txen cate' besele'ede' to bene' byo golje' nchole'.

² Na' gose'e Jesúsen':

—Maestrw, ¿non' nap doła' golje benga nchole', še le' o še xaxne'en?

³ Na' Jesúsen' gože' legaque':

—Benga golje' nchole' gague da' nape' doła' na' gague da' zjanap xaxne'en doła', san golje' ca' cont le'ele can' chon Diosen'.

⁴ Cheyala' goncho xšin Dios ben' gwsela' neda' šlac ne' de latje. Gwžin ža bich gala' gonchon.

⁵ Šlac ne' zoa' yežlion' chgua'a be'ni' lo' yichjlaždao' beñachen'.

⁶ Beyož gwne' ca' gwcho'on xene' lo' yon' na' bene' late' gona' len xene' na' gwdebe' gonan' yejlao bene' lcholen'.

⁷ Nach gože' ben':

—Gwyej jaydib yejlaguon' cho'a yel da' nzi' Yel Siloé.

(Na' Siloé zeje diža' Nselā'.) Na' gwyeje' na' beyib yejlagüen' na' cate' beze'e zjayde' ba chle'ede'.

⁸ Na' beñe' gualiž che' na' nochle beñe' ba be-sele'e le' yogo' ža cate' ñe' nchoľen' gosene':

—¿Gague bengan' ba ble'echo chbe' chñabe' carida?

⁹ Na' bale' gosene':

—Le bengan'.

Na' yebale' gosene':

—Bi nac le' san yeto beñe' yoblen', perw toz ca naque' len benga.

Perw ben' beyaquen' gože' legaque':

—Nedan'.

¹⁰ Na' gose'ene':

—¿Nac goquen' gwzolao chle'edo'?

¹¹ Na' gože' legaque':

—To beñe' le Jesús bene' late' gona' na' gwdeben' yejlaguan' na' gože'nda': “Gwyej cho'a yel da' nzi' Yel Siloé na' jaydiben'.” Na' gwya'a na' beyiban' na' gwzolao chle'eda'.

¹² Nach gose' beñe' ca' le':

—¿Gañxe bena'?

Na' gože' legaque':

—Bi ñezda'.

Beñe' fariseo ca' gosenabyože' nac goquen' ba chle'ede'

¹³ Nach goseche'e ben' goc lchoľen' gan' že' beñe' fariseo ca'.

¹⁴ Nac to ža che Dios caten' Jesúsen' bene' gonan' dan' gwdebe' yejlaao bena' cont ble'ede' na' bi de lsens gon neto' beñe' Israel žin ža che Diosen'.

15 Na' be_{ne}' fariseo ca' le_{ce} gose_{na}bde' le' nac goquen' ba chle'ede'. Na' gože' le_{ga}que':

—Gwdebe' gona' yejlaguan' na' jaydiban' na' na'a ba chle'eda'.

16 Nach ba_l be_{ne}' fariseo ca' gosene':

—Nezecho bi zoa Diosen' len bena' beyone' be_{ne}' l_{ch}olen', le chone' da' bi cheya_la' gone' ža che Diosen'.

Na' yeba_le' gosene':

—¿Nac gon to be_{ne}' güen da' xin_j gone' yela' guac ca dan' ben benga?

Na' le_{ga}ce' besechoje' chop cuen.

17 Na' da' yoble gose'e ben' golje' n_{ch}ole':

—¿Bi žo' le' che ben' bene' cont chle'edo'?

Na' bena' gwne':

—Naque' to be_{ne}' choe' xtiža' Dios.

18 Na' be_{ne}' gwnabia' che naci_on Israel cheton' bi gose_le'e golje ben' n_{ch}ole' na' na'a ba_{ch} chle'ede'. Nach gosaxe' xax_{ne}'ena'.

19 Na' gose_{na}bde' le_{ga}que', gose'ene':

—¿Xi'in_{le} benga ben' žale golje' n_{ch}ole'? ¿Nacxe goquen' chle'ede' na'a?

20 Xax_{ne}'ena' gose'e le_{ga}que':

—Nezeto' bengan' xi'in_{to}', na' nezeto' golje' n_{ch}ole'.

21 Perw bi nezeto' nac goquen' ba chle'ede' na'a, na' ne_{ca} nezeto' non' ben cont ba chle'ede'. Ba zejeczede' iz, le nabe cuine' cont güe'e diža' naquen' goc.

22 Xax_{ne}'en gosene' ca' da' chesežebe' be_{ne}' gwnabia' ca', le be_{ne}' gwnabia' ca' ba gose_{ch}oglagüen' bi yosolebe' lo' yodaon' note'teze be_{ne}' güe'e diža'

chejle'e Jesúsen' naque' Cristo ben' chesebeze' yedenabi'e.

²³ Da'nan' xaxne'en gosene': "Ba zejeczede', le nabe cuine'."

²⁴ Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen can' gwnao' bače. Nezeto' ben' gwnao' beyon le' naque' bene' güen da' xinj.

²⁵ Na' ben' beyac yejlagüen' gwne':

—Bi nezda' še naque' bene' güen da' xinj o še bi naque'. Da' nezda', goca' bene' lchoł na' na'a ba chle'eda'.

²⁶ Na' da' yoble gose'e le':

—¿Bi bende' le? ¿Nac benen' chle'edo'?

²⁷ Na' gože' legaque':

—Ba gwnicza' le'e na' bi chzenagle. ¿Bixchen' chaclaže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' le', gosene':

—Le' naco' txen len le', san neto' nacto' txen len da' Moisés.

²⁹ Nezeto' Diosen' be'lene' Moisésen' diža', perw benga bi nezeto' ga ze'e.

³⁰ Na' ben' golje' nchole' gože' legaque':

—iDa' zaca' yebanecho, bi nezele ga za' benga, na' bene' cont chle'eda'!

³¹ Nezecho Diosen' bi chzenague' che bene' cheson da' xinj, san chzenague' che note'tez bene' chejnlaže' le', bene' cheson can' chnalažen'.

³² Na' gwzolaoten cate' gwxe yežlion' bina' yenecho zoa bene' chac chone' cont chle'e bene' golje' nchole'.

33 Šaca' bengan' bi ze'e gan' zoa Diosen' bibi gac gone'.

34 Be_{ne}' fariseo ca' beselocchgüe' na' gose'e le':

—Len' goljtio' naco' be_{ne}' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

Be_{ne}' ca' zjančo_lyichjlažda'ogaque'

35 Jesúsen' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwse_len'?

36 Na' gož ben' le':

—Be_{ne}', gwna neda' non', cont šejnilaža'ne'.

37 Jesúsen' gože'ne':

—Nedan' ben' ba ble'eczedo' na' nedan' choe'lena' le' diža'.

38 Nach bena' bzoa xibe' benxene' Jesúsen', gwne':

—Xana', chejnilaža' le'.

39 Nach Jesúsen' gwne':

—Za'a yežlio nga cont gata'bia' non' nap do_la' na' non' bi nap do_la'. Zedeyena' cont be_{ne}' ca' bi chesejni'i bich yesaque' ca be_{ne}' lčo_l, na' zedeyena' cont be_{ne}' ca' chesacde' chesejni'ide' yesaque' ca be_{ne}' lčo_l len yichjlažda'ogaquen'.

40 Nach ba_l be_{ne}' fariseo ca' nita' ga_la'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca be_{ne}' lčo_l?

41 Nach Jesúsen' gože' le_gaque':

—Šaca' nacle ca be_{ne}' lčo_l, bibi xto_la'le de, san žale chejni'ile, na' da'nan' naple do_la'.

10

Jempl che bene' güeye' xila' ca'

¹ Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban.

² Ben' chsaljue' na' cho'e cho'a puerten', len' güeyoe' xilan'.

³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'.

⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en.

⁵ Bi chesa'oba' bene' yoble, san chosyoxonjba' dan' bi zjanombia'ba' ši'en.

⁶ Jesús'en' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

Jesúsen' zaca'lebde' ca to bene' chyo'e xila' chen' binlo

⁷ Nach Jesús'en' bsed blo'echde' legaque' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'.

⁸ Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'.

⁹ Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela'

m̄ban c̄hegaque' toli tocan̄e na' soacza' gaclena' legaque' bite'tez da' cheseyažjde'.

10 'Beñe' ca' žia' beñe' gwban chesaclaže' yesone' cont beñe' ca' žia' zjanaque' xila' chia' yesebejyichje' xtižan' na' yosozenague' c̄he legaque'. Na' še yosozenague' c̄he legaque', yesebiaye'e. Na' neda' za'a chnežjua' yela' m̄ban toli tocan̄e c̄he beñe' chesejnilaže' neda' cont ñite' güenchgua.

11 Neda' binlo chgüia chña'a beñe' chesejnilaže'nda' ca chon to beñe' güeye' xila' beñe' chyoe' xila' chen' binlo. Na' da' nži'ida' legaque', da'nan' chzane cuina' gata' ñeche legaque'.

12 Nita' beñe' chesezi' laxjue' cont chosoyoe' xila' c̄he beñe'. Na' beñe' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be c̄hegaque'. Chesoe' latje chñiz beco'yon' xila' ca' na' chesoslasba' legacba'.

13 Na' beñe' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be c̄hegaque', san chosoyoeba' dan' chesezi' laxjuen'.

14 'Neda' binlo chgüia chña'a beñe' ca' chesejnilaže'nda', chona' ca chon to beñe' chyoe' xila' chen' binlo. Na' nombi'a beñe' ca' chesejnilaže' neda' na' legaque' zjanombi'e neda'.

15 Nombi'a legaque' ca Xan' nombi'e neda' na' neda' nombi'a Xan'. Na' da' nži'ida' legaque' chzane cuina' gata' ñeche legaque'.

16 Nita' beñe' yoble beñe' bi zjanaque' beñe' Israel beñe' yesejnilaže' neda'. Na' cheyała' šjatoba' legaque' cont yosozenague' chia', nach yesaque' toze len yezica'chle beñe' ba chesejnilaže' neda' na' toz neda' gwgüia ña'a yogo'lole'.

17 'Chzane' cuina' yesot be_{ne}' neda', na' techle yebana' da' yoble. Na' X_{an}' chacchde' neda' le chazlaže' da' chona' ca'.

18 Nono checa'a yela' mban c_{hian}' san chzanlaže' cuina' gata'. Guac zane cuina' yesote'nda' na' lecz guac yeyas yebana' ladjo be_{ne}' guaten', can' non X_{an}' mandadw gona'.

19 Na' da' yoble be_{ne}' naci_{ón} Israel c_{heton}' besechoje' c_{hople} ne_{che} xtiža' Jesúsen'.

20 Zane' gosene':

—Yo'o da' x_{igüen}' yichjlažda'ogüe', nan' chol ch_{ne}noše'. ¿Bix_{chen}' chzenagle xtižen'?

21 Na' yeba_{le}' gosene':

—Be_{ne}' yo'o da' x_{igüen}' yichjlažda'ogüen' bi gac gwšalje' ca'. ¿Guac gon da' x_{igüe}' cont le'e be_{ne}' lchol?

Be_{ne}' gwnabia' c_{he} naci_{ón} Israel besegue'ede' Jesúsen'

22 Na' cate' bžin ža gwyo'o l_{ni} dan' chesone' chjasyeze'ede' žan' beyož besyeyone' yodao' blao c_{he} Diosen', ba bžin tiemp zag Jerusalénna'.

23 Na' Jesúsen' chde' chašil c_{he} yodao' blaon' gan' nzi' Chašil c_{he} Salomón.

24 Na' be_{ne}' gwnabia' c_{he} naci_{ón} Israel c_{heton}' gosec_{hje}' Jesúsen' na' gose'ene':

—¿Bix_{chen}' chono' cont chacžejlaže'to' še naco' Cristo ben' chbezto' sela' Diosen' cont yedenabi'e naci_{ón} c_{he}chon'? Še len' Criston', gwnatega neto' zaca'lao.

25 Na' gož Jesúsen' lega_{que}':

—Ba gwnia' le'e na' bi chejle'le. Da' ca' ba bena' len yela' guac c_{he} X_{an}' chlo'en naca' be_{ne}' gwsele'.

26 Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e.

27 Nombi'a bene' chesejnilaže' neda', na' žia' legaue' xila' chia'. Legaue' chosozenague' chia' na' chesone' con can' chzejni'ida'ne'.

28 Na' chnežjua' legaue' yela' mban toli tocanē na' gwbat yesebiaye'e na' nono gac yesyeca'a legaue' lo na'.

29 Xan' ba gwleje' bene' ca' chesejnilaže' neda' cont chgüia chna'a legaue'. Na' nono gac yesyeca'a legaue' lo na' Xan', le nape' la'zelagüe yela' chnabia' xen.

30 Neda' na' Xan' toz bene' nacto'.

31 Beyož gwne' ca' bene' gwnabia' ca' gosenize' yej cont yosochelenen'.

32 Na' gož Jesúsen' legaue':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

33 Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chneya'o che Diosen'. Con benachze le' na' chon cuino' ca Dios.

34 Na' gož Jesúsen' legaue':

—Nezeczele can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.”

35 Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'.

36 Diosen' gwleje' neda' cont gaclena' benachen' že' yežlio nga na' ¿nacxechen' ža le'e chneya'a che Diosen' da' žia' naca' Xi'ine'?

37 Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'.

38 Perw še chacbe'ele chona' da' zaca' len yela' guac che Diosen', cheyala' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz beñen' nacto'.

39 Nach da' yoble gosaclačže' yesezene' Jesúsen' perw bitw bdole'.

40 Jesúsen' beyeje' jayzoe' yešla'a yegw Jordanna' latje gan' gwzoe da' Juanna' šlac ne' chzoe' bene' nis.

41 Na' beñe' zan ja'ac gan' gwzoe' cont bosozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benga naquen da' li.

42 Na' beñe' zan gosejnilaže' Jesúsen' latje na'.

11

Can' goc cate' got Lázaro

1-2 Na' gwzoe to beñe' gocšene beñe' yež Betania le' Lázaro. Betania naquen laž María na' beñe' bile' Marta, na' legaque' zjanaque' beñe' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'.

3 Na' beñe' zan Lázaron' gosesele' diža' gan' zoa Jesúsen', chese'e le':

—Xanto', beñe' xmigo' Lázaron' ba chacšende'.

4 Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele

catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

⁵La'czla' Jesúsen' chacde' Martan' len bene' bilen' na' len Lázarón',

⁶cate' gwñezde' chacšene Lázarón', bega'añche' yechope ža gan' zoen'.

⁷Nach gože' bene' ca' zjanaque' le' txen:

—Le šo'o šejcho distritw Judean' da' yoble.

⁸Na' gose'ene':

—Maestrw, bi ža na'zen' bene' gwnabia' che nación chechon' gosaclačže' yesote' le' yosochele' le' yej. ¿Da' yoble šejo' na'?

⁹Jesúsen' gože' legaque':

—Lagüe žan' nsa' šižinw hor, na' bene' chda lagüe ža bi chčhegüe', le nseni' gwbižen' lo yežlion'.

¹⁰Na' bene' chda ba gol chčhegüe', le nac chol.

¹¹Gwde gwne' ca' nach gože' legaque':

—Bene' xmigwcho Lázarón' ba chtase' na' ša'a šjaysbana'ne'.

¹²Na' gose'ene':

—Xanto', še ba chtase' güeyacczede'.

¹³Jesúsen' gwne' ca' dan' gwñezde' ba got Lázarón', na' bene' ca' zjanaque' Jesúsen' txen gosacde' še chtaszen'.

¹⁴Nach Jesúsen' bochixgaten' bi zejenna' gwne' ca':

—Ba got Lázarón'.

¹⁵Na' chebeda' bi gwzóa' na' šlac chacšende', cont gona' šejle'le chia'. Le šo'o šejcho gan' de'na'.

¹⁶Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

Jesúsen' že' chac chosbane' beṇe' guat

17 Na' ja'aque' Betanian' len Jesúsen', na' cate' besežine' na' beṇe' Betania ca' bosozende' le' ba goc tap ža bosocuaše' Lázaron'.

18 Betanian' chin' gaḷa' ze Jerusalénṇa' ca do gašjw hor.

19 Na' beṇe' zan beṇe' gualaž čhegaque' že' Jerusalénṇa' besežine' gan' zoa Martan' len Marían' cont yeso'e legaque' yela' chxenlaže' da' got beṇe' zangaquen'.

20 Nach Martan', cate' gwṇezde' Jesúsen' ba bžine' cho'a yežen', na' gwze'e jašague'ne'. Na' Marían' bega'ane' yo'ona'.

21 Nach Martan' gože' Jesúsen':

—Xana', šaca' zo' nga caten' gocšene beṇe' zanan' bilja gote' šaca'.

22 Na' ṇezda' la'czla' ba gote', bite'tez da' ṇabdo' Diosen' gone', gonzcen'.

23 Nach gož Jesúsen' le':

—Güeban beṇe' zanon'.

24 Nach Martan' gože'ne':

—ṇezda' yebane' cate' yesyeban beṇe' guat ca' žan' te čhe yežlion'.

25 Na' gož Jesúsen' le':

—Neda' chac chosbana' beṇe' guat ca' le nsa'a yela' mban toḷi tocaṇe. Da'nan' beṇe' ca' yesejnilaže' neda', la'czla' yesate', guata' yela' mban čhegaque' toḷi tocaṇe.

26 Na' note'tez beṇe' nite' chesejnilaže' neda', gwbat yesebiaye'e. ¿Chejli'o da' nga chnia' le'?

27 Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' seļa' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

²⁸ Beyož gwna Martan' ca' beyeje' jayeže' María bilen' šižize:

—Ba bla' Maestron' cho'a yežen' na' chñie' le'.

²⁹ Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'.

³⁰ Biņa' žin Jesúsen' lagüe yežen' ca' horen', ne' nga'ane' cho'a yežen' gan' jašag Martan' le'.

³¹ Na' beņe' Jerusalén ca' nita' liž María, beņe' cheso'e le' yela' chxenlaže' da' got beņe' zanen', cate' besele'ede' gwza' Marían' nach gosa'aclene' le', gosacde' zeje' cho'a blojen' gan' ngaše' zjacheže'.

³² Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga' caten' gocšene' da' beņe' zanan', bilja' gote' šaca'.

³³ Na' cate' ble'e Jesúsen' chbež Marían' na' lecze chesebež beņe' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'.

³⁴ Na' gože' legaque':

—¿Ga' bcuaše' lene'?

Na' gose'e le':

—Xanto', yo'o na' le'edo'.

³⁵ Na' gwchež Jesúsen'.

³⁶ Na' beņe' Jerusalén ca' gosene':

—Le' na' catequen' chacde' le'.

³⁷ Na' bale' gosene':

—Bengan' bene' ga ble'e be_{ne}' l_{ch}olen', na' šaca' gwzoe' nga caten' gocšene Lázaron', ben_{lj}e' cont bi gote'.

Jesúsen' bosbane' Lázaron' ladjo be_{ne}' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'en_{na}'.

³⁹ Na' Jesúsen' gože' be_{ne}' ca':

—Le ca'a yejen'.

Na' Martan' be_{ne}' zan da' Lázaron' gože'ne':

—Xana', ba ch_la' ben' zigw, le ba_{ch} goc tap ža gote'.

⁴⁰ Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' be_{ne}' zaca' juisyw.

⁴¹ Nach be_{ne}' ca' goseque'e yejen'. Na' Jesúsen' gw_{ne}'e yabale na' gwne':

—Xa', cho_xcleno' ba bzenago' čhia'.

⁴² Nezda' yogo' ni'a chzenago' čhia', perw žia' ca' cont be_{ne}' ca' že' nga yesejle'e len' gwselo' neda'.

⁴³ Beyož bo_l güiže' Diosen', gw_{ne}' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' lega_{que}':

—Le yozaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

⁴⁵ Na' zan be_{ne}' Jerusalén ca' be_{ne}' ja'aclene' Marían' besele'ede' yela' guac da' ben Jesúsen' na' gosejnilaže'ne'.

46 Perw bal bene' Jerusalén ca' ja'aque' lao bene' fariseo ca' na' jaseže' legaque' Jesúsén' bosbane' Lázaron'.

47 Nach bꝥoz gwnabia' ca' che neto' bene' Israel len bene' fariseo ca' bosyotobe' yogo'lol bene' ca' chesenabia' nación chton'. Na' bosoxi'e gosene':

—¿Nac goncho? le yela' guac zan chon benga.

48 Na' še nacho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

49 Na' to bene' gwnabia' zoa ca horen' le' Caifás. Le' naque' bꝥoz blao lo izen'. Na' gože' legaque':

—Le'e gague bi nezele.

50 Na' bi chacbe'ele napen chio' cuent toz ben' gat, clél ca cuiayi' yogo'cho lente nación checho nga.

51 Gague con ca gwnalaže'ze Caifásén' gwne' ca', san da' naque' bꝥoz blao iznan', Diosén' bene' ga gwne' ca' cont gwdixjue'ede' gat Jesúsén' neche nación chton'.

52 Na' ca nac dan' gaten', gague gate' neche nación cheto' na'zen' san gate' cont yogo' bene' ba gwlej Diosén' yesaque' xi'ine' gate'teze nación, yesaque' txen yesejnilaže'ne'.

53 Ca' goquen', žana' bene' gwnabia' ca' gosezo-lagüe' bosoxi'e nacle yesone' yesote' Jesúsén'.

54 Na' da'nán' Jesúsén' bich gwdacze' con can' nla'ze gan' že' bene' gwnabia' che nación chton'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi gala'ze latje dašen', na' besyega'aṇe' na'.

55 Na' ba zoa gala' l̄ni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gala'le l̄nin' cont yeson cuine' xilaže' can' ža ley cheton'.

56 Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' l̄ni nga, še bi yide'?

57 Gosene' ca' le b̄xoz gwnabia' cheto' ca' na' bene' fariseo ca' ba gosechoguen' še note'tez bene' nezde' gan' zoa Jesúsen' cheyala' gwzende' legaque' cont yesezene' le'.

12

Marían' chgüe'e set zix̄ ni'a Jesúsen'

(Mt. 26:6-13; Mr. 14:3-9)

1 Na' yexop ža za' gala' l̄ni pascon', Jesúsen' gwche'e bene' ca' zjanaque' le' txen yež Betanian' gan' zoa Lázarón' ben' bosbane' ladjo bene' guaten'.

2 Na' bal bene' Betanian' bososiñi'e to xše' da' gwdagw Jesúsen' cont gosonxene'ne'. Na' Martan' bdie' yela' guagw na' Lázarón' gwche'lene' bene' ca' cho'a mesen' txen len Jesúsen'.

3 Na' Marían', de ca do tya set zix̄ che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gala'ze xni'a Jesúsen' na' gwlo'e set zix̄en' ni'ena' na' beyoža' bosbižen' len yiša' yichje'. Na' doxen yo'ona' gwla'chguan ze set zix̄en'.

4 Na' Judas Iscariote xi'in̄ to bene' le' Simón, le' naque' to bene' šižinw ca' zjanaque' Jesúsen' txen, na' len' ba naquen gwdie' Jesúsen' lo na' bene' ca' chesegue'ede' le'. Na' Judasen' gwne:

⁵ —¿Bixchen' bi bete' seten' na' gone' mechon' cont gaclenen beṇe' yaše'? le zacan' ca no laxjw mos da' gone' gan tgüiz.

⁶ Judasen' gwne' ca' gague da' beyaše'de' beṇe' yašen' san da' goque' beṇe' gwban. Len' beṇue' mechw da' bosochin yogüe' na' gwlejlane' mechon'.

⁷ Nach Jesúsen' gože'ne':

—Bibi ye'lné', le ba bene' da' non gone' len neda' che ža cate' gaša'.

⁸ Beṇe' yaše' ca' nita'cze' len le'e bate'teze, san neda' bich soacza' yesša len le'e.

Bxoz gwnabia' ca' bosoxi'e yesote' Lázaron'

⁹ Na' beṇe' zan beṇe' Israel gualaž cheton' gosenezde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclačže' yesele'ede' lencze Lázaron' ben' bosbane' ladjo beṇe' guaten'.

¹⁰ Na' bxoz gwnabia' che nación Israel cheton' bosoxi'e lecze yesote' Lázaron',

¹¹ le beṇe' zan beṇe' Israel ba chesyecuase' len legaque' na' ba chesejnilaže' Jesúsen' dan' gosenezde' bosbane' Lázaron'.

Jesúsen' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsen' len beṇe' ca' zjanaque' le' txen gosa'aque' Betanian' na' ja'aque' Jerusalén. Na' beṇe' zan chesežag Jerusalénna' da' ba zoa gała' lṇin', na' zane' cate' gosenezde' žin Jesúsen' Jerusalénna',

¹³ besežaše' jaseleze' le' zjanoxe' no zin. Na' chesegüe'e lban' che', chesene':

— ¡Le_e be_{ne}' zaca' benga! Mbalaz ben' za' nga nsela' Xancho Diosen' le' cont nabi'e. ¡Mbalaz be_{ne}' naque' Rey che nación Israel chechon'!

¹⁴ Na' bžel to burr dao' be gwžia Jesúsen', na' goc can' nyoj Xtiža' Diosen' žan:

¹⁵ Le'e chonxenle Diosen' ciuda Jerusalénna', bi žeble;

le na', ba za' Rey chelen' žie' to burr dao'.

¹⁶ Na' be_{ne}' ca' zjanaque' Jesúsen' txen gague cate gosejni'ide' chac con can' bosozoj ben' goso'e xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le Jesúsen' naque' be_{ne}' zaca' juisyw, cana'ch jasyeza'laže' diža' ca' da' zjanyoj che Jesúsen' na' gosejni'iden'.

¹⁷ Be_{ne}' ca' besele'e cate' Jesúsen' bol güiže' Lázaron' na' bosbane' le' cont bechoje' lo' ban' gosoe'lene' be_{ne}' ca' že' lo ciudan' diža' can' goquen'.

¹⁸ Na' da'nan' be_{ne}' zan jaseleze' Jesúsen' da' ba gosende' diža' che yela' guac dan' bene' bosbane' Lázaron'.

¹⁹ Nach be_{ne}' fariseo ca' gose' lježe':

— Ba chle'ele bibi chac bi goncho. Yogo'ze be_{ne}' ba chosozenague' che'.

To chope be_{ne}' griego gosenabe' yesoe'lene' Jesúsen' diža'

²⁰ Na' zjalen to chope be_{ne}' griego be_{ne}' ca' ja'aque' gosonxene' Diosen' lo lñin'.

²¹ Na' be_{ne}' ca' besežine' gan' zoa Felipen' ben' nac be_{ne}' Betsaida ga mbane distritw Galilean', na' gose'ene':

— Si'xenšco', chaclaže'to' güe'lento' Jesúsen' diža'.

22 Na' Felipen' gwyeje' jane'e Andrésen' nach choptie' jaseže' Jesúsén' ca'.

23 Nach Jesúsén' gože' legaque':

—Na'a ba bžin hor gac yogo'loł da' cheyała' gac cont la'lagüe naca' bene' zaca' juisyw.

24 Žia' to da' zejen, še to trigon' bi yexinjen cate' lažon' lo yon', con chega'ańcze tozen; perw še yexinjen na' yelan', da' zan trigon' gonen.

25 Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocanē.

26 Na' note'tez bene' chesaclaže' yesone' xšinan', cheyała' yesejnilaže' neda' na' yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

Jesúsén' gwdixjue'ede' yesot bene' le'

27 'Ba chžaglagua' lo' yichjlažda'oguan'. ¿Cahauele nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

28 Nach bol güiže' Diosen', gwne':

—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne Dios ben' zoa yaban', gwne':

—Ba bena' len le' cont chesacbe'e bene' naca' bene' zaca' juisyw na' za' goncha' ca' yeto.

29 Na' zan bene' ca' že' na' gosende' dan' gwna Diosen' na' gosene' gwzion' gwne. Na' yebale' gosene':

—To angl gwne' le'.

³⁰ Na' Jesúsen' gwne':

—Diosen' gwne' neda' zižje gague cont neza' neda' chzenague' chia' san cont neze le'e.

³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen.

³² Na' cate' yeselise' neda' to le'e yag, cana'ch gona' cont zan bene' že' doxen lo yežlion' yesejni-laže' neda'.

³³ Gwne' ca' cont gosenezde' yesot bene' le' yosode'ene' to le'e yag cruz.

³⁴ Na' bene' ca' že'na' clele gosejni'ide' dan' gwenen' na' gose'e le':

—Ba beneto' can' ža Xtiža' Diosen' da' nyojen, na' nezeto' žan Cristo ben' sela' Diosen' yedenabi'e nación chechon' soe' toli tocañe. Na' le' žbixchen' žo' naco' bene' gwseła' Dios goljo' benach na' žo' yesote' le' to le'e yag cruz še ca'? žNox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle da' mal dan' chnabia' le'e. Ben' chda gan' nac choł bi chacbe'ede' gan' zeje'. Can' naquen len le'e.

³⁶ Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

Zan bene' Israel bi gosejnilaže' Jesús'en'

37 Na' la'czla' bene' Israel gualaž cheto' ca' be-sele'ede' ben Jesús'en' da' zan yela' guac, zane' bi gosejnilaže'ne'.

38 Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton', na' nono chesacbe'e blo'o yela' guac chion'.

39 Bi goc yesejle'e, le goc chegaque' can' ža yeto dan' bzoj da' Isaíasen', žan:

40 Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjaņezde' bi zejen, na' bi chesacbe'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesacbe'ede' bi zejen dan' chlo'eda' legaque',

ba besyetingde' na' ba beca'a xtoła'gaquen' šaca'.

41 Da' Isaíasen' gwne' ca' da' ble'ebande' nac Jesús'en' bene' zaca' juisyw nach be'e diža' che'.

42 Na' la'czla' zanch bene' Israel gualaž cheto' ca' bi gosejnilaže' Jesús'en', bia'cze bene' zan na' len no bene' gwnabia' cheto' gosejnilaže'ne', perw bi goso'e diža' chesejnilaže'ne' le besežebe' bich yosoleb bene' fariseo ca' legaque' lo' yodaon'.

43 Gosaclačhe' yesenite' binlo len beņachen' clal ca yesenite' binlo len Diosen'.

Xtiža' Jesús'en' naquen da' žialao

44 Nach Jesús'en' gwne' zižje gože' bene' ca' že'na':
—Bene' chesejnilaže' neda' gague neda'zen' chesejnilaže' san lente Xan' ben' gwsela' neda'.

45 Na' bene' chne'e neda' chle'ede' bene' gwsela' neda'.

46 Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'.

47 Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le bi za'a yežlion' cont gwnežjua' castigw che xtoła' benachen', san za'a cont gwnežjua' yela' mban toli tocañe che bene' yesejnilaže' neda'.

48 Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' doła' cate' žin ža te che yežlion'.

49 Gague bia' diža' to gualaza', san Xa' ben' gwsela' nedan' none' mandadw bin' cheyała' nia' na' bin' cheyała' gwsed gwlo'eda'.

50 Na' nezda' dan' none' mandadw nia' nsan' yela' mban toli tocañe che bene' yosozenag chen. Na' da' li, con can' ža Xan', can' choe'lena' le'e diža'.

13

Gwdib Jesúsen' ni'a bene' ca' zjanaque' le' txen

1 Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' godde' yogo' bene' ba chejnilaže' le' lo yežlio nga. Da'nan' za' gala' lni pascon' bzejni'ide' bene' ca' zjanaque' le' txen, le chacyane'czede' legaque'.

2 Baç gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo na' bene' ca' chesegue'ede' le'. Na' ba zjanite' chesagüe' xše'.

³ Na' Jesúsen' nezde' Xen' ba bene' cont nape' la'zelagüe yela' chnabia', na' nezde' gan' zoa Diosen' gwze'e na' gan' zoe' nan' yeyeje'.

⁴ Da'nan' gwzože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bchej lsinen'.

⁵ Nach gwxi'e nis na' gwde'en to lo' ša' na' gwzo-lagüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nčej lsinen'.

⁶ Na' cate' ba zoa čhibe' ni'a Simón Pedro, Pedron' gože'ne':

—Xana', čle' čhibo' ni'an'?

⁷ Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje čhibo' ni'an'.

Jesúsen' gože'ne':

—Še bi čhiban', bich gaco' txen len neda'.

⁹ Na' Pedron' gože'ne':

—Xana', gague ni'a na'zen' čhibo' še ca', san doxena'.

¹⁰ Nach gož Jesúsen' le':

—Bene' noša' nazje', ni'e na'zen' chyažjen čhibe', le doxen cuerp čen' naquen xilaže'. Can' nac le'e, nac lažda'olen' xilaže', la'czla' gague yogo'le.

¹¹ Jesúsen' gwnezde' non' gwde' le' lo na' bene' chesegue'ede' le'. Da'nan' gwne': “Gague yogo'le nac lažda'olen' xilaže.”

¹² Na' cate' beyož gwdibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e?

¹³ Le'e nsi'le neda' Maestrw na' Xanle, na' güenczen' žale, le can' naca'.

¹⁴ Na' neda' la'czla' naca' Xanle na' Maestrw chele, ba gwdiba' ni'alen' ca to mos, na' can' cheyala' gaclen lježle ca to mos.

¹⁵ Ba gwdiba' ni'alen' cont blo'eda' le'e cheyala' gonle can' ba benan'.

¹⁶ Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi zaca'che' ca bene' gwseła' le'.

¹⁷ Še chejni'ile da' quinga na' gonle can' gwnian', nach soale mbalaz.

¹⁸ 'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: “Bene' gwdagw len neda' txen ba blej bšoše' neda'.”

¹⁹ Chnia' le'e da' quinga cate' za' gac ca' cont cate' ba goc ca' soachachle šejle'le le naca' ben' gwseła' Diosen' can' ba gwnia' le'e.

²⁰ Chnia' le'e to da' zejen, bene' ca' chosolebe' note'tez bene' chseła', neda'czen' chosolebe' še ca', na' bene' chosolebe' neda' lecze chosolebe' Dios bene' gwsele' neda'.

Jesúsen' gwne' toe' gwdie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' bene' chesegue'e neda'.

22 Na' be_{ne}' ca' zjanaque' le' txen con chesena' cho' alao lje_{že}' chesone' xbab che noen' gwne' ca'.

23 Na' toe' chi'e cuiten' dan' chaquegüe' Jesúsen' le'.

24 Nach Pedron' bene' señw len bena' cont gw_nabde' Jesúsen' no chen' gwne' ca'.

25 Nach gwbigue' bago gože' Jesúsen':

—¿Non' gon ca'?

26 Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjue' Judas Iscariote be_{ne}' nac xi'in to be_{ne}' le' Simón.

27 Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

28 Na' ne to ben' zjachi' cho'a mesen' bi gosejni'ide' bixchen' gože' le' ca'.

29 Ba_{le}' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo' lnin' o šjanežjue' mechw da' chyažje no be_{ne}' yaše'.

30 Nach cate' beyož gw_dagw Judasen' pedas yetextil dan' bnežjw Jesúsen' le', la' bchojte'. Na' ba nac ba go_l gual.

To da' cobe da' non Jesúsen' mandadw goncho

31 Gwde bchoj Judasen', Jesúsen' gwne':

—Diosen' gwsele' neda' golja' be_nach na' na'a ba nla'laon naca' be_{ne}' zaca' juisyw, na' neda' lecze ba chlo'a Diosen' naque' be_{ne}' zaca' juisyw.

³² Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a.

³³ Xi'inda'ogua', yešložga soa' len le'e. Na' yey-iljwle neda', na' chnia' le'e dan' goša' bene' gwn-abia' che nación Israel chechon', bi gac sa'lenle neda' gan' yeya'an.

³⁴ Na' to da' cobe chžia' bia' gonle, gaque lježle tole yetole. Can' chacda' le'e, lecz can' cheyalā' gaque lježle tole yetole.

³⁵ Na' yeseneze yogo'lo! bene' nacle neda' txen še soacze gaque lježle tole yetole.

*Jesúsen' gwne' Pedron' bi chebe' nombi'ene'
(Mt. 26:31-35; Mr. 14:27-31; Lc. 22:31-34)*

³⁶ Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

³⁷ Na' Pedron' gože' le':

—Xana', ¿bixchen' bi gac sa'lēna' le' na'a? Gwzanlaže' cuina' gata' še chonen byen cont gaclena' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gacleno' neda'? Da' li chnia' le', cate' cuež jean' ba goc šon ni'a bi chchebo' nombi'o neda'.

14

Bene' chesejnilaže' Jesúsen' lecze zjanombi'e Xe' Diosen'

¹ Bich gacžejlaže'le. Le šejnilaže' Diosen' na' lecze le šejnilaže' neda'.

² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de čhele, san yeya'a šjayenšagua' yo'o čhe to tole.

³ Na' cate' yeyož šjayenšagua' yo'o čhele ca', cana'ch yida' da' yoble yečhi'a le'e cont yedyezoale gan' šjayzoa' neda'.

⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' bene' yela' mban toli tocanē. Ne toze bene' bi yežine' gan' zoa Xan' še bi šejnilaže' neda'.

⁷ Še nombia'yane'le neda', lente Xan' ba nombia'le še ca'. Na' bačh nombia'lnē' na'a na' ba ble'elne'.

⁸ Na' gož Felipen' le':

—Ben cont le'eto' Xaon', lezen' chnabeto' le'.

⁹ Jesúsen' gože'ne':

—Felipe, sša xen ba gwzoa' nga len le'e na' ¿biña' gombi'o neda'? Note'tez bene' ba ble'e neda' lencze Xan' ba ble'ede'. ¿Bixčhen' chnabo' gona' cont le'ele Xan'?

¹⁰ ¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'.

¹¹ Le šejle' chia' zoa' len Xan' na' le' zoe' len neda'. Na' še bi chejle'lextižan', le šejle' chia' dan' ba ble'ele chona' yela' guac.

12 Na' chnia' to da' zejen, bene' ca' chesejnilaže' neda', da' ca' chonan' lecze legaquen yesone'. Na' da' zaca'ch ca da' ca' yesone', le yeya'a gan' zoa Xan'.

13 Na' bite'teze da' nabele Xan' lagüe da' chejni-laže'le neda' naca' Xi'ine', gonan', cont gwlo'a nac Xan' bene' zaca' juisyw.

14 Bite'tez da' nable gona' lagüe da' chejnilaže'le neda', neda' gonan'.

Jesúsen' gwne' sele' Spiritw che Diosen'

15 Še chaquele neda', gonle can' nona' mandadw.

16 Na' nabda' Xan' cont sele' Spiritw chen' soan len le'e toli tocañe na' gaclenen le'e. Na' Spiritw che Diosen' gwzejni'in le'e da' nac da' li.

17 Na' bene' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoan lo' yichjlažda'olen' nabian' le'e.

18 Bi yocua'ana' le'e ca bi' güezebe. Güidcza' yeto gan' zoale nga.

19 Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocañe, da'nan' soale toli tocañe.

20 Na' cate' žin ža yedeso Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e.

21 Bene' zjañezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

22 Na' Judas (perw gague Judas Iscariote) gože'ne':

—Xanto', ¿bixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

23 Na' Jesúsen' gože'ne':

—Bene' chesacde' neda' chosozenague' xtižan', na' Xan' lecze gacde' legaque' na' neda' len xan' yedesoato' len legaque'.

24 Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwseła' neda'.

25 'Da' quinga ba gwnia' le'e šlac ne' zoa' len le'e.

26 Na' Xan' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyala' nezele na' gonen cont šjayza'laže'le yogo' dan' ba gwnia' le'e.

27 'Na' hcua'ana' le'e na' chona' cont soa cuezle binlo len xbab chelen'. Chaclaža' soa cuezle binlo len xbab chelen' can' zoa' neda'. Nono benach gac gone' cont soa cuezle binlo len xbab chelen' can' chac chona' neda'. Bi gacžejlaže'le, neca žeble.

28 Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyala', nach chebele dan' yeya'a gan' zoa Xan', le Xan' zaca'che' ca neda'.

29 Na' ba gwnia' le'e na'a bibi na' gac, cont soachachle šejnilaže'le neda' caten' gac ca'.

30 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tillenen neda', perw bi gonen neda' gan.

31 Chona' con can' non Xan' mandadw cont neze benachen' chacda' Xan'. Le šo'o na'a, ba gole šejcho.

15

Jesúsen' zaca'lebe' ca to yag da' chbia uvas

1 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'.

2 Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch.

3 Na' le'e ba nacle ca to xozen' da' ba mpe'e, le bač chzenagle xtižan' dan' ba be'lena' le'e.

4 Le soačhač len neda' cont soačhača' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soačhačle len neda'.

5 'Neda' zaca'leba' ca to yag da' chbia uvas na' le'e zaca'leble ca xozen'. Note'tezle še soačhačle len neda' lecze soačhača' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle.

6 Bene' bi zoačhače' len neda', gac che' can' chac len xoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont cheseyen.

7 'Na' le'e še zoačhačle len neda' na' zoačhačle chzenagle xtižan', bite'tez da' chaclaže'le nabele Diosen', gonczen'.

8 Chacxen Xan' cate' zoale chonchguale dan' chazlažen', na' še chonle ca', yesacbe'e bene' da' li chejnilaže'le neda' na' chzenagle chia'.

9 Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e.

10 Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

11 'Ba gwnia' le'e ca' cont soale mbalaz ca mbalazen' zoa' neda'. Chacłaža' soale mbalaz juisyw.

12 Na' da' nga nona' mandadw gonle, gague lježle tole yetole can' chacda' neda' le'e.

13 Nono zoa beņe' chaquech lježe' ca beņe' chzanłaže' cuine' gate' neche beņe' migw che'. Na' can' chona' neda'.

14 Na' le'e nacle migw chia' še chonle con can' nona' mandadw.

15 Na' bich žia' nacle beņe' güen žin chia', le to beņe' güen žin bi neзде' yogo' da' chon xanen', san žia' nacle migw chia'. Le yogo'lol da' ba benda' gwna Xan' ba bzejni'idan' le'e.

16 Gague le'e gwlejle neda' naca' Xanle. Neda' gwleja' le'e cont chejnilaže'le neda'. Na' chsela' le'e cont šjenle can' chazłaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejnilaže'le neda', gonczen'.

17 Da' nga da' chona' mandadw gonle, gague lježle tole yetole.

Beņe' bi chesejnilaže' Diosen' chesegue'ede' beņe' chosozenag che Jesúsen'

18 'Še beņe' bi chesejnilaže' Diosen' chesegue'ede' le'e, le gon xbab ba chesegue'eczedede' neda' cate' za' yesegue'ede' le'e.

19 Ša nacle txen len bene' ca' bi chesejnilaže' Diosen', nachen' yesacde' le'e can' chesaque' bene' lježen' šaca'. Perw ba gwleja' le'e cont chzenagle chia'. Da'nan' chesegue'ede' le'e da' bi nacle legaque' txen.

20 Le šjasa'laže' dan' gwnia' le'e: “Note'teze mos bi naque' blaoch ca xanen'.” Bosochi bososaca' bene' neda', na' lecz ca' yesonde' le'e. Na' balze bene' bosozenague' xtižan', lecze balze' yosozenague' xtiža'len'.

21 Na' da' bi zjanombi'e Diosen' ben' gwsela' neda', da'nan' yesonde' le'e yogo' da' ca', le chesegue'ede' le'e da' chzenagle chia'.

22 Ša neda' bi bedezejni'ida' legaque', bi zjanape' doła' da' chesegue'ede' neda' šaca'. Perw na'a bibi de da' yosode'ede' yesene' bi zjanape' doła'.

23 Bene' chgue'ede' neda' lente Xan' chgue'ede'.

24 Ba bena' yela' guac da' nono nochle na' gon, na' šaca' bi besele'eden' bi zjanape' doła' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'.

25 Na' chac can' nyoj Xtiža' Diosen' dan' chososed' gan' žan: “Besegue'ede' neda' la'czla' bibi da' mal bena'.”

26 Ba gwnia' le'e sela' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'.

27 Na' lecz ca' le'e cheyala' güe'le xtižan', le ba gwzoale len neda' šlac ba gwdixjue'eda' xtiža' Xa' Diosen'.

16

1 Ba gwnia' le'e yogo' da' ca' cont bi gacžejlaže'le.

² Le yesyebeje' le'e lo' yodao' c̄hegaque' ca', na' gwžin ža cate' note'tez beñe' yesote' le'e yesacde' chebe Diosen' dan' chesonen'.

³ Yesonde' le'e yogo' da' ca' le bi zjanombi'e X̄an' ñeca neda'.

⁴ Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw c̄he Diosen'

'Bi gwnia' le'e yogo' da' ca' gac c̄hele cate' za' gwzolao bzejni'ida' le'e xtiža' Diosen', le ñe' zoacza' chaclena' le'e.

⁵ San ña'a yeya'a gan' zoa X̄an' ben' gwsela' neda', na' ñe tole bi chñabele neda' gan' yeya'a.

⁶ Na' ba chacyaše'le dan' ba gwnia' yeya'a.

⁷ Perw da' li napan le'e cuent yeya'a, le še bi yeya'a, Spiritw c̄he X̄a' Diosen' dan' gaclenen le'e bi yedesoan lo' yichjlažda'olen'. Na' yeya'a nach sełan' len le'e.

⁸ Na' cate' yid Spiriton' gwzejni'in benačhen' zjanape' doła', na' gwzejni'in non' nac beñe' güen len Diosen', na' gwzejni'in gata' castigw toli tocañe c̄he beñe' bi chosozenague' chia'.

⁹ Spiriton' gwzejni'in legaque' zjanape' doła' da' bi chesejnilaže' neda'.

¹⁰ Na' gwzejni'in legaque' non' nac beñe' güen len Diosen', le yeya'a gan' zoa X̄a' Diosen' na' le'e bich le'ele neda'.

¹¹ Na' gwzejni'in legaque' gata' castigw c̄he xtoła'gaquen' toli tocañe, le Satanás dan' chnabia' da' xigüe' ca' na' dan' chnabia'te beñe' ca' bi chesejnilaže' Diosen' ba nchoglaon c̄hen gwnežjw Diosen' castigw c̄hen toli tocañe.

12 'Ne' dech da' zan da' n̄ia' le'e, perw naquen zdebe šejni'ilen n̄a'a.

13 San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyala' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene X̄an' len, na' chixjue'en le'e bica' da' za' za'ac.

14 Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'.

15 X̄an' ba bene' cont nezda' yogo' da' neze le', na' da'nan' gwnia' Spiriton' chixjue'en le'e xtižan'.

Jesúsen' gwne' šložze yesacyaše'de' na' techle yesyebede'

16 'Šlož bi le'ele neda', na' te yešlož na' yezle'ele neda' da' yoble, le yeya'a gan' zoa X̄an'.

17 Na' ba le bene' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa X̄en'?

18 ¿Bi zejen dan' že' yešlož? Bi chejni'icho bin' že'.

19 Jesúsen' gočbe'ede' chesaclaže' yesenabde'ne' bi zejen, na' gože' legaque':

—¿Ba chnabe lježle bi zejen dan' gwnia': “Yešlož na' bich le'ele neda' na' techle lecze yešlož na' yezle'ele neda' da' yoble”?

20 Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele.

21 Cate' chzan no'olen' chžaglagüe' šlac chaque' bes che yela' sanña'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto benač yežlio nga.

22 Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

23 'Na' cate' ba bžin ža šjayzoa' da' yoble gan' zoa Xan', cana'ch bich yažjele bi nabe gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', goŋczen' le'e.

24 Ža na'aža bibi na' nabele Xan' ye'ln'e' chnablen da' chejnilaže'le neda'. Na' na'a le nabe Xan' bi da' nabelene' ye'ln'e' ca', na' gone' can' nabelenen' cont soale mbalaz juisyw.

Criston' ba bene' cont yenit yela' chnabia' che gwxiyen'

25 'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'.

26 Na' cate' ba bžin žana', cana'ch nabele Xan' bi da' nabelene' ye'ln'e' chnablen da' chejnilaže'le neda'. Na' bi yažjen nabda' Xan' gaclene' le'e.

27 Le cuincze Xan' chacde' le'e dan' chaquele neda' na' chejle'le gwsele' neda'.

28 Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

29 Nach gose'ene':

—Bač cho'o diža' da' chejni'ito' na' bi cho'o jemplw.

30 Ba chacbe'eto' nombi'o yogo' xbab che beṇachen'. Ba ṇezledo' bi chesaclačže' beṇe' yesenēzde' cate' biṇa' yesenaben'. Da'nan' baḥ chejle'to' zao' gan' zoa Diosen'.

31 Na' gož Jesúsen' legaque':

—¿Ba chejle'le ṇa'a?

32 Ba bžin ža na' ṇa'a ba gole' gaslasle. To tole ca'a xṇez che chele na' gwcua'anle toza'. Perw bi zoa' toza', le zoa Xan' len neda'.

33 Ba gwnia' le'e ca' cont soa cuezle binlo len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa ṇa'a chnabian' yežlio nga.

17

Jesúsen' gwnabde' Diosen' gaclene' beṇe' ca' zjanaque' le' txen

1 Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nachbia' nedan' Xi'inno' naca' beṇe' zaca' juisyw cont neda' gona' ga gacbia' le' naco' beṇe' zaca' juisyw.

2 Ba beṇo' neda' yela' chnabia' lao yogo' beṇaḥ cont chnežjua' yela' mban toli tocanē che yogo' beṇe' ca' ba gwlejo' chesejnilaže' neda'.

3 Na' beṇe' ca' zjanape' yela' mban toli tocanē zjanombi'e le', le tozon' zaco' gonxento', na' lecze zjanombi'e neda' Jesucristw beṇe' gwselo'.

4 'Lo yežlion' ba bena' cont nachbia' naco' beṇe' zaca' juisyw, le ba beyož bena' yogo'lol da' gwlo'o lo na' gona'.

5 Na' na'a Xa', ben cont la'laon naca' bene' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

6 'Ba gwlejo' bał beṇaḥ chesejnilaže' neda', na' baḥ blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'.

7 Na' ba zjaṇezde' yogoloł da' chona' na' yogo' diža' da' choa' zjanaquen chio' le'.

8 Le ba be'lena' legaque' diža' dan' ba bzejni'ido' neda' na' ba bosozenague' chen, na' ba chesache'ede' da' li gwza'a gan' zon', na' chesejle'e le len' gwselo' neda'.

9 'Chnaba' gacleno' legaque'. Bi chnaba' gacleno' yogo' beṇaḥ, san gacleno' bene' ca' gwlejo' chesejnilaže'nda' le ba zjanaque' lo nao'.

10 Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecz zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

11 'Na' na'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' chnaba' gwchino' yela' chnabia' chio' cont gwcuas gwcuizo' da' malen' len legaque' cont nita'cze' yesaque' toze len lježgaque', ca chio' naccho toze.

12 Šlac ba gwzoa len legaque', neda' ba bchina' yela' chnabia' chion' cont bcuas bcuiža' da' malen' len legaque'. Da'nan' ne toe' bi gwžiayi', con toz ben' ba naquen cuiaye'e cont gac doxen can' ža Xtižo' dan' nyojen.

13 'Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca mbalazen' zoa' neda'.

14 Neda' ba be'lena' legaque' xtižon', na' bene' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'.

15 Na' ca' nac bene' ca' chesejnilaže' neda', bi chṇaba' yeca'o legaque' lo' yežlio nga, san chṇaba' gacleno'ne' cont Satanás dan' chnabia' da' xigüe' ca' bi siye'en legaque'.

16 Legaque' bi zjanaque' txen len bene' bi chesejnilaže' le', ca' neda' bi naca' txen len bene' bi chesejnilaže' le'.

17 Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li.

18 Len' gwseło' neda' yežlion' cont ba bia' xtižon', na' lecze ca' chselā' legaque' yeso'e xtižan'.

19 Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

20 'Na' bi chṇaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga.

21 Xa', ben cont yogo'lole' yesaque' toze len lježgaque' na' yesaque' txen len chio', ca' le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwseło' neda'.

22 Na' yela' bala'an dan' noṇo' neda' ba bnežjuan'

legaue' cont zjanaque' toze len bene' lježe' ca chio' naccho toze.

²³ Legaue' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwse_lo' neda' na' yesacbe'ede' chacdo' bene' ca' can' chacdo' neda'.

²⁴ Xa', chacdo' neda' cate' bina' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw.

²⁵ Xa', naco' la'zelagüe bene' chon da' zej to licha. Na' ca nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanезде' len' gwse_lo' neda'.

²⁶ Na' ba bzejni'ida' legaue' can' nacon' na' can' chonon', na' za' gwzejni'ichda' legaue', cont yesacbe'ede' chacdo' legaue' can' chacdo' neda', na' cont neda' soacza' len legaue'.

18

Judasen' bdie' Jesúsén' lo na' soldadw ca'

(Mt. 26:47-56; Mr. 14:43-50; Lc. 22:47-53)

¹ Beyož gwna Jesúsén' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' gosoe lo' le'ejen'.

² Na' Judasen' ben' ba naquen gone' Jesúsén' lo na' bene' ca' chesegue'ede' le' lecze nombi'e latjen', le zan ni'a Jesúsén' len bene' ca' zjanaque' le' txen ba besedobe' na'.

³ Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bxož gwnabia' ca' na' bene' fariseo ca' cont yesezene' Jesúsen'. Zjanxobe' no lintern na' zjanoxe' no yi' yech na' zjanałe' spada.

⁴ Jesúsen' ba nežde' yogo'lol da' za' gac che', na' bchoje' jašague' legaque' na' gwne':

—¿Non' cheyiljwle?

⁵ Na' gose'ene':

—Cheyiljwto' Jesús bene' Nazaret.

Na' gož Jesúsen' legaque':

—Nedan'.

Na' Judasen' ben' ba naquen gone' Jesúsen' lo na'gaquen' zelene' legaque'.

⁶ Cate' Jesúsen' gože' legaque': “Nedan”, la' besyebiga'te' cosxanle na' jasechaze' lo yon'.

⁷ Na' da' yoble Jesúsen' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús bene' Nazaret.

⁸ Na' Jesúsen' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

⁹ Gwne' ca' cont goc can' ba gwdixjue'ede' caten' gwne': “Ne to bene' ca' ba gwlej Diosen' chesejni-laže' neda' bi yesebiaye'e.”

¹⁰ Na' Simón Pedron' no'e to spada na' goljen' gwdinen' mos che bxož blaon' gwchogtechgüe' nague' licha. Na' mosen' le' Malco.

¹¹ Na' Jesúsen' gože' Pedron':

—Bego'o spada chion' lo' ližen'. ¿Chacdo' bi cheyala' gac da' ba nžia bia' Xa' Diosen' gac chia'?

Goseche'e Jesús'en' lao ben' le' Anás
(Mt. 26:57-58; Mr. 14:53-54; Lc. 22:54)

¹² Nach soldadw ca' len xangaque' na' len bene' chesape' yodao' blao che nación Israel cheton' gosezene' Jesús'en' na' bosocheje'ne'.

¹³ Na' goseche'ene' da' nechw lao Anás ben' naque' xta'obi'in che Caifás. Na' Caifásen' goque' bꞑoz blao che nación Israel cheton' lo izen'.

¹⁴ Na' Caifásna' ben' gože' bene' gwnabia' cheton' napen legaque' cuent toz ben' gat clel ca cuiayi' yogüe'.

Pedron' bi gwchebe' naque' Jesús'en' txen
(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto bene' naque' Jesús'en' txen gosa'ogüe'ne'. Na' nombia' ben' nac bꞑoz blao ben' yeto. Da'nan' goc gwyo'e len Jesús'en' chyo'o che bꞑoz blaon'.

¹⁶ Na' Pedron' bega'ane' do cho'a puerten'. Nach ben' yeto, da' nombia' bꞑoz blaon' le', gwyeje' na' be'lene' diža' bi' no'olen' chap cho'a puerten' cont gwlo'obe' Pedron'.

¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

¹⁸ Bene' güen žin ca' na' bene' ca' chesape' yodao' blaon' ba gosebeque' to yi' ya'alj, le' chac zag, na' zjazeche' cho'a yin' cont chesyeže'ede'. Na' Pedron' ze' len legaque' cho'a yin' cheže'ede'.

Gosenabde' Jesúsen' che dan' chsed chlo'eden'
(Mt. 26:59-66; Mr. 14:55-64; Lc. 22:66:71)

¹⁹ Na' ben' nac b̄xoz blaon' gwn̄abde' Jesúsen' che bēne' ca' chosozenag che dan' chsed chlo'eden' na' che da' ca' chzejni'iden'.

²⁰ Na' Jesúsen' gože'ne':

—Ba bi'a diža' doxen latje lagüe. Zan ni'a bsed blo'eda' lo' yodao' checho ca' na' chy'o yodao' blaon' gan' chesežag yogo' bēne' gualaž chechon'. Bibi diža' gwnia' bagaše'ze.

²¹ ¿Bixchen' ch̄n̄abdo' neda'? Gwn̄abe bēne' ca' gosende' dan' bsed blo'edan'. Legaque' zjānezde' bi dižan' bia'.

²² Beyož gwna Jesúsen' ca', to ben' chape yodao' blaon' zie' na', na' gwdape' x̄aguen', gože'ne':

—¿Ca' choži'o xtiža' ben' nac b̄xoz blaon'?

²³ Jesúsen' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bixchen' chgapo' neda'?

²⁴ Nach Anásen' bdie' Jesúsen' ncheje' lao Caifásen' ben' nac b̄xoz blaon'.

Da' yoble Pedron' bi gw̄chebe' še naque' txen len Jesúsen'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' bēne' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gw̄chebe', gwne':

—Bi lena' neda'.

²⁶ To xmos b̄xoz blaon' naque' biše' ljež ben' gw̄chog Pedron' naguen', na' le' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?

²⁷ Na' Pedron' da' yoble bi gwchebe', na' la' gwchežte to jea.

Goseche'e Jesúsen' lao Pilaton'

Mr. 27:1-2, 11-14; Mr. 15:1-5; Lc. 23:1-5)

²⁸ Na' do cheni'las beṇe' gwnabia' ca' gosebeje' Jesúsen' gan' zoa Caifásen' na' goseche'ene' gan' zoa gobernador Pilato ben' chon yeḷa' justis. Na' legaque' bi goso'e len Jesúsen' yo'o gan' zoa Pilaton', le can' nac costumbr cheton' bi chac yesagüe' xše' lni pascon' še yeso'e gan' že' beṇe' bi zjanac beṇe' Israel.

²⁹ Da'nan' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' beṇe' gwnabia' ca' gosene':

—Šaca' benga bi naque' beṇe' güen da' xinj bi bdeto'ne' lo' naon'.

³¹ Na' gož Pilaton' legaque':

—Le yeche'e, na' le gon yeḷa' justis che' can' ža ley chelen'.

Nach beṇe' gwnabia' che nación Israel cheton' gose'ene':

—Bi de lsens gotto' beṇe'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'.

³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che beṇe' Israel ca'?

³⁴ Jesúsen' gože'ne':

—¿Con da' goljlažon' chṇabo', še beṇe' yoble gose'e le' ca'?

35 Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' b̄xoz gwnabia' chele ca' bosodie' le' lo na' nga. ¿Bi da' xinj benon'?

36 Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedile' cont bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

37 Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benačhen' diža' li na' yogo' bene' chesone' txen len diža' li chosozenague' chia'.

38 Nach gož Pilaton' le':

—¿Bi dan' diža' li?

Gosechoglagüen' yesote' Jesúsen'

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaue':

—Bibi nla'lagüe še bi da' xinj non benga.

39 Perw na' de costumbr chele gwsana' to bene' de ližya lo lni pascon'. ¿Chaclaže'le gwsana' benga naque' Rey che le'e bene' Israel?

40 Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to be_{ne}' gwban.

19

¹ Nach Pilaton' bene' mandadw goseyine' Jesúsen'.

² Na' soldadw ca' gosone' to corona de xis yeše' na' bosozoen' yichj Jesúsen' na' bosoguacue'ne' to lache' moradw ca da' choso_{ch}in no rey.

³ Nach goson_{le}' che', gosene':

—¡Viva Rey che be_{ne}' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' be_{ne}' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

⁵ Na' bechoj Jesúsen' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' lega_{que}':

—Le na', nga ze ben'.

⁶ Na' b_xoz gwnabia' ca' na' be_{ne}' chesape' yodao' blaon' cate' besele'ede' Jesúsen' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' lega_{que}':

—Le'e le che' na' le gwde'e le'e yag cruzen', le neda' bibi da' xinj cheželda' še bin' none'.

⁷ Na' be_{ne}' gwnabia' ca' che nación Israel cheton' gose'e le':

—De to ley cheto' da' žan cheya_{la}' gate' da' že' naque' Xi'in Dios, le con to be_{na}chzen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'.

9 Na' beyo'e yo'o gan' zoe' da' yoble, n̄che'e Jesúsen', na' gože' Jesúsen':

—¿Ga beñe' le'?

Na' Jesúsen' bi boži'e xtižen'.

10 Nach Pilaton' gože'ne':

—¿Bi choži'o xtižan'? ¿Bi ñezdo' napa' yeł'a' chnabia' cont gwsana' le' na' napa' yeł'a' chnabia' cont chogbi'an yosode'e le' le'e yag cruz?

11 Jesúsen' gože'ne':

—Bibi yeł'a' gwnabia' napo' šaca' Diosen' bi nonen' le'. Da'nan' beñe' bdie' neda' lo naon' napche' doł'a' ca le'.

12 Nach Pilaton' beyiljwlaže' nacle gone' gwsane' Jesúsen'. Perw beñe' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez beñe' že' naque' rey chone' contr rey César.

13 Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yeł'a' justisen', to latje da' nzi' Gan' Nagw Yej, na' diža' hebreo nzin' Gabata.

14 Do guagwbiž ža cate' za' solao l̄ni pascon' Pilaton' gože' beñe' gwnabia' cheto' ca':

—Le na', nga zoa rey chelen'.

15 Nach da' yoble gosezolagüe' bososye'e gosene':

—¡Cheyala' gate'! ¡Bde'e le'e yag cruz!

Nach Pilaton' gože' legaque':

—¿Rey chele nga gona' mandadw yosode'e le'e yag cruz?

Nach b̄xoz gwnabia' ca' gose'ene':

—Gague rey cheto' benga. Toze César naque' rey cheto'.

¹⁶ Nach Pilaton' bdie' Jesúsen' lo na'gague' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudan'.

Bosode'e Jesúsen' le'e yag cruz

(Mt. 27:32-44; Mr. 15:21-32; Lc. 23:26-43)

¹⁷ Na' Jesúsen' zeje' no'e yag cruz chen' na' be-sežine' to latje nzi' Latje che Žit Yichj Bene' Guat, na' diža' hebreo nzin' Gólgota.

¹⁸ Na' soldadw che gobernadoren' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwyo'e gachol bene' ca' chope'.

¹⁹ Na' gobernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: “Jesús bene' Nazaret, Rey che bene' Israel”.

²⁰ Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesúsen' le'e yag cruzen' naquen gala'ze ciuda Jerusalénna'.

²¹ Nach b χ oz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' “Rey che bene' Israel”, san bzoj: “Le' gwne' naque' rey che bene' Israel.”

²² Na' Pilaton' gwne':

—Da' bena' mandadw bosozoje', ba nyojenna'.

²³ Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi'

to toe'. Na' lecze goseque'e yeto xe' da' naquen to güelize, na' bibi dia chen de.

²⁴ Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: “Besyele'e xalanan' legacze', na' gosone' rifa lache' dan' chazan'.”

²⁵ Na' do gała'ze yag cruz che Jesúsen' zecha Marían' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala.

²⁶ Na' cate' Jesúsen' ble'ede' zecha xne'en gała'ze len to bene' naque' le' txen, bene' chaquechgüe Jesúsen' le', nach gože'ne':

—Bena' gaque' ca xi'ino'.

²⁷ Nach gože' bena':

—Bži'ilaže' xna' nga ca xnao'.

Na' žana' gwque'ene' bene'ne' ca bene' lo' yo'o.

Can' goc caten' got Jesúsen'

(Mt. 27:45-66; Mr. 15:33-41; Lc. 23:44-49)

²⁸ Gwde na' Jesúsen' ba nezde' bač goc yogo' da' cheyała' gac. Nach cont goc can' ža yelate' Xtiža' Diosen' da' nyojen gwne':

—Chbiłda' nis.

²⁹ Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwłisen' blapen' cho'a Jesúsen'.

³⁰ Na' beyož gwxop Jesúsen' vinon' na' gwne':

—Bač goc yogo'lol da' cheyała' gac.

Nach bcheque' yichjen' gote'.

To soldadw godoe' lanza cuit le'e Jesúsen'

31 Na' yeteyo gaquen ža che Dios na' ža lni xen, da'nan' beņe' gwnabia' che naci3n cheton' jasenabde' Pilaton' gone' mandadw yeseyišjw soldadw che' ca' ni'a beņe' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosaclaže' yeseda'ch beņe' ca' le'e yag cruzen' ža che Dios.

32 Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a.

33 Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

34 Perw to soldadon' godoe' lanza cuit le'e Jesúsen', na' la' bchojten chen len nis.

35 Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le.

36 Na' goc da' ca' len Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'."

37 Na' yeto da' žan: "Yesene'e ben' ba bosožie' güe'."

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

38 Beyož goc yogo' da' ca', José beņe' nac beņe' ciuda Arimatea jaņabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gwyeje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' bagaše'ze da' chžebe' beņe' gwnabia' cheto' ca'.

39 Na' len Josén' lecze gwyej Nicodemo ben' ba gwyej gan' zoa Jesúsén' šeže'le. Na' Nicodemon' no'e to da' chla' zix da' none' len yal dan' že' mirra, na' len to bište dan' že' aloes, ca do šoṇa roben'.

40 Nach bosyochele' cuerp che Jesúsén' to lache' xen na' len dan' chla' zixen', ca' chon neto' bene' Israel cate' hcuaše'to' bene' guat.

41 Na' gala'ze latje gan' bosode'e Jesúsén' le'e yag cruzen' gota' to le'ej ga goseze yag. Na' na' za' goseche'ene' to bloj cont yosočhinen' ca to ba, na' nono bene' guat na' šo' lo'enṇa'.

42 Ža caten' got Jesúsén' naquen ža caten' chososiṇi'e che ža che Diosen'. Na' da' chesachyende' yosocuaše'ne', da'nan' jase'lo'e Jesúsén' lo' bloj coba', le naquen gala'ze.

20

Jesúsén' bebane' ladjo bene' guaten'
(Mt. 28:1-10; Mr. 16:1-8; Lc. 24:1-12)

1 Na' bal dmigw María bene' Magdalan' gwyeje' cho'a blojen' gan' bosocuaše' Jesúsén' na' ble'ede' ba bga'a yejen' dan' bosode'e cho'a blojen'.

2 Nach beza'sese' beyeje' gan' zoa Simón Pedron' len yeto bene' naque' Jesúsén' txen, na' gože' legaque':

—Ba besyebeje' Xanchon' lo' blojen' na' bi nezeto' ga besyeyo'ene'.

3 Nach Pedron' na' ben' yeto gosa'aque' ja'aque' cho'a blojen'.

4 Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enṇa' ca le'.

⁵ Na' bcheque' gw_{ne}'e lo'enna' na' ble'ede' lache' ca' zjachin' lo yo perw bi gwyo'e.

⁶ La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'.

⁷ Na' bay dan' bosoguazje' yichjen' bi chin' gan' chi' lache' ca', san ndoben chin' šla'ale.

⁸ Nach lencze ben' yeto gwyo'e, le bina' šo'e la'czla' byobech bžine' cho'enna', na' ble'ede' can' naquen na' gweyje'le'e.

⁹ Le bina' yesejni'ide' Xtiža' Diosen' da' nyojen žan cheyala' yebane' ladjo bene' guaten'.

¹⁰ Na' besyeya'aque' jaya'aque' yo'o gan' nite'na'.

María bene' Magdalan' ble'ede' mbancze Jesúsen' (Mr. 16:9-11)

¹¹ Na' Marían' bega'ane' na' gwzeche' gala'ze cho'a blojen' chbeže'. Na' ne' chbežte' ca' bcheque' gw_{ne}'e lo' blojen'.

¹² Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'.

¹³ Nach gose'e no'olen':

—¿Bixchen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jas-esane'ne'.

¹⁴ Beyož gwna' Marían' ca' gweychje' ble'ede' zecha Jesúsen' cožen', perw bi gocbe'ede' še naque' le'.

¹⁵ Na' gož Jesúsen' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach bol güiže' le', gože'ne':

—Beñe', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesúsen' gože'ne':

—¡María!

Na' Marían' gwyechje' da' yoble na' gože'ne':

—¡Raboni! —naquen to diža' hebreo na' zejen Maestrw.

¹⁷ Jesúsen' gože'ne':

—Bi goxo' neda', le biña' yeyepa' gan' zoa Xan'. Beyej len yezica'chle beñe' ca' ba bosozenag xtižan' beñe' ca' zjanaque' ca biše' zana', na' gožgaque' yeyepa' gan' zoa Xan' ben' lecz naque Xale. Naque' Dios ben' chonxena' na' lecz naque' Dios ben' chonxenle.

¹⁸ Nach beza' María beñe' Magdalan' na' jay-dixjue'ede' yezica'chle beñe' ca' chosozenag xtiža' Jesúsen' le ba ble'ede' Xanchon'.

Beñe' ca' zjanaque' Jesúsen' txen besele'ede' mbancze'

(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc chol že' dmigon', beñe' ca' zjanaque' Jesúsen' txen zjandop zjanžague' lo' yo'o na' zjanseyjwte' puert ca' da' besežebe' beñe' gwn-abia' che nación Israel cheton'. Nach Jesúsen' ble'e na' gwze' gachol legaque'. Na' gože' legaque':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaque' taque' ca' na' cuit le'ena'. Na' besyebede' cate' besele'ede' le naque' Xanchon'.

²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwseła' Xan' neda' yežlio

nga bia' xtižen', lecze ca' neda' chselā' le'e güe'le xtižan'.

²² Beyož gwne' ca' blobe' legaque' na' gože' legaque':

—Le si' Spiritw che Diosen'.

²³ Beņe' ca' yesyetiņje xtolā'gaquen', naple yelā' chnabia' ye'lnē' ba gwnitlaon, na' naple yelā' chnabia' cont ye'le beņe' bi yesyetiņje xtolā'gaquen' bitw ņitlaon.

Tomás ble'ede' mban Jesúsen'

²⁴ Na' Tomás ben' bososi'e Tomás Cuaš lene' len beņe' šižinw ca' ba gosedalene' Jesúsen', na' bi gwzoe' cate' Jesúsen' bedyelo'elagüe' legaque' že' dmigon'.

²⁵ Na' beņe' ca' yezica'chle gose'ene':

—Ba ble'eto' Xanchon'.

Na' Tomásen' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa Tomásen' len legaque'. Na' da' yoble nyeyjw puert ca', cate' bezlā' Jesúsen' na' gozzeche' gachol legaque'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomásen':

—Gwnā' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' beņe' bi chejle', san šejli'o.

²⁸ Nach Tomásen' gože'ne':

—iXana' na' Dios chia'!

²⁹ Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

Da' quinga zjanyojen cont šejle'cho Jesúsen' naque' bene' gwsela' Dios

³⁰ Da' zan yela' guac ben Jesúsen' da' besele'e bene' ca' zjanaque' le' txen da' bi nyojen nga.

³¹ Perw zjanyoj da' quinga cont šejle'le Jesúsen' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli tocanē chele da' chejnilaže'lene'.

21

Jesúsen' blo'elagüe' gaže bene' ca' zjanaque' le' txen

¹ Gwdechle yeto ža yoble Jesúsen' bozlo'elagüe' bene' ca' zjanaque' le' txen cho'a nisdao' da' nzi Nisdao' Tiberias. Quinga goc:

² Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yechope bene' ca' zjanaque' Jesúsen' txen.

³ Na' Simón Pedron' gože' legaque':

—Ša'a gwxcen bel da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdaon' na' gosoe to lo' barcw. Na' nocze no bel beseželde' že'na'.

⁴ Na' do ba zoa šeni' besele'ede' zecha Jesúsen' cho'a nisdaon', perw bi gosacbe'ede' še Jesús nan'.

⁵ Nach Jesúsen' gože' legaque':

—Bene' migw chia' ¿nono bel chdole'le?

Na' gose'ene':

—Nono chdole'to'.

⁶ Nach gože' legaque':

—Le gwzala' yixjw bel chelen' cuit barcon' lichale na' senlba'.

Nach bosozala' yixjw bel chegaquen', na' tantw be zan besedola', bi gosezoede' yosyocuen' lo' barcon'.

⁷ Nach ben' chaquechgüe Jesúsén' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsén'.

⁸ Na' yezica'chle bene' ca' zja'aclene' barcw daon' zjanxobe' yixjw gan' že' bel ya'a ca'. Bi naquen zito' cho'a nisdaon', ca do yeto gayoa metrze.

⁹ Na' cate' besyežine' cho'a nisdaon' besele'ede' chi' yi' ya'alj na' xoa bel ya'a lagüenna' na' len yetextil.

¹⁰ Na' Jesúsén' gože' legaque':

—Le yeyoxe' ngale to chope bel ya'a ca' za' gwx-enle.

¹¹ Na' Simón Pedron' gwyeye' jaxi'e yixjw belén' gan' chi' barcon' na' bexoben' ga nac yo biž. Žen' to gayoa ši'ineyon bel xen, perw bi bcheza' yixjon' la'czla' be zan gwže' lo'enna'.

¹² Na' Jesúsén' gože' legaque':

—Le da gagwle xsil.

Na' ne toe' bi besyeyaxjde' ye'ene': “¿No le?”, le ba gosacbe'ede' naque' Xanchon'.

13 Jesúsen' gwbigue' na' gwxi'e yetextilen' na' bnežjue' che to toe' na' lecz ca' bene' len bel ya'an.

14 Da'na' goc da' gwyon̄ ni'a blo'elao Jesúsen' bene' ca' zjanaque' le' txen gwde bebane' ladjo bene' guaten'.

Jesúsen' be'lene' Simón Pedron' diža'

15 Na' cate' besyedagüe', Jesúsen' gože' Simón Pedron':

—Simón xi'in̄ Jonás, ¿chaquechdo' neda' clél can' chesaque bene' quinga neda'?

Pedron' boži'en gože'ne':

—Xana', neздо' chacda' le'.

Jesúsen' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

16 Na' da' gwchop̄ ni'a gože' le':

—Simón xi'in̄ Jonás, ¿chacdo' neda'?

Na' da' yoble gwna Pedron':

—Xana', le' neздо' chacda' le'.

Jesúsen' gože'ne':

—Bgüia gw̄na' bene' ca' chesejnilaže' neda', bene' ca' zjanac ca xila' chia'.

17 Da' gwyon̄ ni'a gož Jesúsen' le':

—Simón xi'in̄ Jonás, ¿chacdo' neda'?

Na' Pedron' gocyasē'de' dan' gož Jesúsen' le' ca' da' gwyon̄ ni'a, na' gože' le':

—Xana', le' neze nle'edo' yogo'lol. Neздо' chacda' le'.

Jesúsen' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'.

18 Da' li chnia' le', cate' goco' bene' güego', cuino' gwyaz xalanon' na' gwyejo' con ga žan chio'. Perw

cate' gaco' bene' gole, gwli naon' na' bene' yoble
chize' xalano' na' yeche'e le' ga bi chaclažo'.

¹⁹ Gože'ne' ca' cont gwnezde' can' gacxen Diozen'
len da' gac che' cate' žin ža gate'. Na' gwde gwna
Jesúsen' can' gac che Pedron' nach gože'ne':

—Con gwyejnilaže' neda' na' bzenag chia'.

Can' gwna Jesúsen' che ben' chacchgüede'

²⁰⁻²² Na' yeto bene' naque' Jesúsen' txen na'ogüe'
legaue'. Na' beyechj Pedron' na' ble'ede' le' na'
gože' Jesúsen':

—Xana', ¿nac gac che benga?

Jesúsen' gože'ne':

—Še chaclaža' ne' zoacze' cate' yida' yeto ¿bin'
chacžejlažo'? Con gwzoateze gwyejnilaže' neda'
na' bzenag chia'.

Ben' gwne' ca' naque' ben' chaquechgüe Jesúsen'
na' ben' gwche' cuiť Jesúsen' txen cate' gosagüe'
xše' žen' cate' za' gac Jesúsen' lo na' bene' ca'
cheseque'ede' le'. Na' cana' bena' gwñabde'ne':
“Xana', ¿noxen' gwdie' le' lo na' bene' ca'?”

²³ Na' dan' gož Jesúsen' Pedron': “Še chaclaža' ne'
zoacze' cate' yida' yeto ¿bin' chacžejlažo'?”, da'nan'
gwditj diža' len bene' ca' chsejnilaže' Criston'
gosene' bi gat bena'. Perw Jesúsen' gague gože'ne'
bi gate', san gože'ne': “Še chaclaža' ne' zoacz benga
cate' yida' yeto, ¿bin' chacžejlažo'?”

²⁴ Nedan' nezda' can' goc yogo' da' quinga na'
da'nan' ba bia' diža' chegaquen na' ba bzojan'. Na'
lecze le'e nezczele choa' diža' li.

²⁵ Na' da' zanch da' ben Jesúsen' da' bi zjanyojen,
le ša zjanyoj yogon' tgüejje tgüejjen, libr zan juisyw
yesaquen še ca'.

Da' na'ze chzoja' ṅa'a.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
de7d40fb-3909-53d8-8bea-744cf1ce0e41